

रोम रोमि विस्वासुल्कुनाहाटीं पौलसना सिट्टि

इद सिट्टिता बारेमते गिचचो परिचयम

रासतोना पोरोल: पौलस

रासता कालम: इसवि सन 58

पौलस इद सिट्टि रासाका मुन्ने रोम सहरते होना हिल्लोर. अदुनहाटीं इद सिट्टि रासि अगाटा विस्वासुल्कुंक ओर ओना सतता परिचयम वेहचंतोर. अयना अगाटा विस्वासुल्कुनाल इच्चुर विस्वासुल्क ओन्क एरपाट मत्तुर. अयते पौलसुंक ओरगा होंचि कोन्नि रोजकु ओरतोनि मंचि, ओर्क येसु किरिस्तुना बारेमता बेसता कबुर वेहचि पजा अगटाल इसपानिया इनना देसेम होनना पिलान मत्ता.

दुनियाते मनना अन्नि जातिना लोकुल्क उंदच्चोने पापम कीसि मंतुर. पेनदा मुन्ने नित्तना इत्ते अंटोरगुडा नीतिमंतुल्क आयापीता, अस्केन पेनदा मुन्ने नित्ता परांतुर. बोर अयते येसु किरिस्तुनपोरीं विस्वासम ईरतुर पेन ओर्कुन नीतिमंतुल्क कीसि, पूना पिस्वर हींता. बच्चोन तकलिप्क-कस्टाल्क वायिनागानि ओप्के पीसि मनालय येसु किरिस्तु ओना पवित्र आत्माहेंदाल ताकत हींतोर.

इद सिट्टिता आकिर-आकिरते, मना पिस्वर पेनदा सेवाहाटींगे मंदना, विस्वासुल्क अंटोर पावरमते बेस कलियसि मंदना, मना दंटाता विस्वासुल्क हर्रि तप्सि होनाकोंटा ओर्कुन बेस हळकुनना. इल्हा अंटोर विस्वासुल्क कलियसि पिस्ते वेल्लेन सांति-समादानम दोर्कता. इसोंटा पोल्लें पौलस रासतोर.

बगा बतल मंता

परिचयम आनि मुक्य उद्देसम **1:1-17**

यहुदिर्क, यहुदि आयवोर्क इव्वुर्कुगुडा मुक्ति अवसरमे **1:18-3:20**

यहुदिर्क, यहुदि आयवोर्क इव्वुराहाटीं पेनदा मुक्तिता हर्रि **3:21-4:25**

किरिस्तुना लोप्पो पूना पिस्वर **5:1-8:39**

पेनदा पिलानते इस्राएल लोकुल्क **9:1-11:36**

किरिस्तुन विस्वासम कीतोर बल्हा पिसगोम **12:1-15:13**

मुन्नेटाहाटीं पिलानकु आनि जोहार **15:14-16:27**

पौलुस रोमि विस्वासलुकुंक सतता परिचयम कीतोर

1 नना पौलुस, येसु किरिस्तुना दासुन* आंदुन. नना मीकु इद सिट्टि रासेक मंतन. येसु किरिस्तुना कबाहक कियालय पेन नाकुन प्रेरित† इंचि पेरता. पेरसि दाना बेसता कबुर वेहालय लोहता.

2 पेनबाबाल हीतन इत्ता इदे बेसता कबुरता बारेमते पेनदा कबुरतोर मुन्नेने पवित्र दर्मसास्त्रमते रासि इरतुर.

3 इद बेसता कबुर, मनकना रूपमते पुटसि वाता पेनदा मरिना बारेमते मंता. ओर दाविद राजाना वंसमते पुटतोर.

4 गानि मना सामि येसु किरिस्ते पेनदा मरि आंदुर इंचि हुप्सालय पेन दाना पवित्र आत्माता ताकतहेंदाल ओन हातोर लोप्पोटाल मरि जीवाते तेहता.

5 अंदोर लोकुलक ओन विस्वासम कियना, ओर वेहातप ताकना इंचि पेन नावापोरि कुर्पा हुपिच्चि नाकुन येसुनहेंदाल प्रेरित इंचि निलाहता.

6 येसु किरिस्तुना लोकुलक आयनाहाटीं केयतोरव्टे मिमेटगुडा मंतिर.

7 रोम सहरते मनना मीकु अंटोर्क ई सिट्टि रासि नना बतल वेहासेक इत्ते, पेनदुक मिमेट इत्ते वेल्लेन पावरम. इका अद मीकुन दाना पवित्र लोकुलक आयालय केयता. मना पेनबाबाल आनि येसु किरिस्तु सामिनहेंदाल मीकु कुर्पा, सांति दोर्कि.

पौलुस पेनदुक पारतना कीतोर

8 मोदाला नना मीकु वेहानद बतल इत्ते, मीवा विस्वासम बारेमते पूरा दुनियाक तेळियसि होल्ता. इदुन मति कीसेक मीवा अंटोराहाटीं येसु किरिस्तुनहेंदाल पेनदुक दन्यवाद कीतन.

9 पेनदा मरिना बारेमता बेसता कबुरतुन वेहासेक, नावा पूरा मनसुनाल नना पेनदा सेवा कीसेक मंतन.

10 नना पारतना कियानस्के बस्केळक मीकुन मति कीतन. दीनकु आ पेने गवाइ मंता. पेनदा इच्चा मत्ते, ई मल्का अयना मिहगा वायना हरिं दोर्कि इंचि इल्हागुडा नना पेनदुक पारतना कीसेक मंतन.

11 सामिनाहेंदाल नाकु दोर्कता आत्माता वरालकुन मीतोनि पंचकुनना इंचि नावा इच्चा मंता. दीनहेंदाल मिमेट पेनदा बक्तिते गट्टिगा बेसीकिर, अदुनहाटीं नना मिहगा वायालय हळसंतन.

* 1:1 दासु ईनकु कलि, बूति, वेला बतल मन्नो, बस्केळक मालकुना सेवा कीसेके मनांतोर. † 1:1 प्रेरित इच्चुर्कुन पेरसि किरिस्तुना बारेमते वेहालय लोहचीतोरकुन प्रेरितलुक इंचि इतुर.

12 इत्ते, मीकु-नाकु मनालोप्पो मत्ता विस्वासमताहेंदाल मनम वरोंक-वरोर प्रोत्साहन कीकुनना इंचि नावा मनसु मंता.

13 विस्वासुल्कुनिटा! नना मीकु वेहानद बतल इत्ते, यहूदि आयवा लोकुल्कुंक बेसता कबुर वेहिचि ओर्क सहायम कीतन, अस्के ओर ओरा विस्वासमता पिस्वरते बेस बेर्सतुर. अल्हेन मिमेटगुडा मीवा विस्वासमता पिस्वरते बेस बेर्सना इंचि नना ऊके-ऊके मिहगा वायालय हळुंदुन, गानि इदवेरादाका बतलन्ना-बतल अड्डम वासेक मत्ता, इद पोल्ले मीकु तेळियना इंचि नना वेहासेके मंतन.

14 युनानि बासा, युनानि रीति-रिवाजकु तेळियतोर, तेळियवोर लोकुल्कुंक आनि करियतोरक, करियवोर्क इल्हा अंटोर्के पेनदा पोल्ले वेहना जिम्मेदारि नावा पोर्रेन मंता.

15 अदुनहाटीं रोम सहरते मनना मीकगुडा नना बेसता कबुर वेहालय तयार मंतन.

16 विस्वासम कियना अंटोर्कुंक, इत्ते मुन्ने यहूदिल्कुंक पजा युनानि लोकुल्कुंक मुक्ति हियालय ई बेसता कबुरते पेनदा ताकत मंता. अदुनहाटीं नना पेनदा बेसता कबुर वेहालय सिगु अर्रेन.

17 बारित्ते पेनदा मुन्ने मनकल नीतिमंतुड बल्हा आंतोर इत्ता पोल्ले बेसता कबुर मनाकु वेहंता. सुस्वनाल आकिरदाका विस्वासमतेन इद आया परंता. “नीतिमंतुल्क विस्वासमतोनि पिस्संतुर,” इंचि दर्मसास्त्रमते रासि मंता.

अंतोर पापम कीतोरे आंदुर

18 बेसता कबुर अंतोर लोकुल्कुंक एविच्चना अवसरम बारि मंता इत्ते, सत्तेम हर्दे ताकवा लोकुल्क कराब कबाहक कीसि सत्तेमतुन दबांचि इरतुर. निजम पेन हिल्ले इत्ताप ताकसि, तप्पुड कबाहक कीतुर. अदुनहाटीं पेन ओरपोर्गे स्वर्गमताल दाना होंगुन हुप्संता.

19 निजमाता पेन दाना गुनाल्कुन अंतोर लोकुल्कुना मुन्ने हुपिस्ताहाटीं इव अन्नि पोल्ले ओर्क एर्के मंतां.

20 बल्हा इत्ते, इद दुनिया पुटतस्केटाल पेन तयार कीता दुनियातुन हळते, दाना बस्केने दिसुवा गुनम, बस्केळक मनना ताकत मनाकु दिसंता. अदुनहाटीं पेनदुन एरपाट किय्योम इंचि मनकालोर इना पस्स.

21 ओर पेनदुन अयते एरपाट कीतुरे, गानि पेनदुन बल्हा अयते तल्सकुनागोम अल्हा तल्सकुन्नुर इंका दाना कदरगुडा किय्युर. अल्हा किय्यका ओर अट्टि विचाराल्क कीसि ओरा मनसुने हीकटा कीकुत्तुर.

22 “मोमोट तेल्विगल्लोरम,” इंचि वेहकुंचि ओर बुद्दि हिल्वोरलेसीं आतुर.

23 बस्केळक नासडेम आयाकौंटा मंदना महिमागल्ला पेनदुन ओर मोळकका, दाना जेगाते नासडेम आयना मनकानव, पिट्टेनव, जिवरासिनव आनि तरासुनलेहका बैंगना जिवरासिना बोम्मां कीसि मोळकालय दलगतुर.

24 अदुनहाटीं ओरा मनसुने मत्ता बोगम विचाराल्कुन पूरा कीकुनालय पेन ओर्कुन होळसीता. अस्के ओर वरोना मेंदुल वरौंक कदर हिलाकौंटा बोगमतनाल्क कीतुर.

25 पेनदा बारेमता सत्तेम पोल्ले आबद्दम आंद, इल्हा इन्कुंचि ओर्कुन तयार कीता पेनदुन मोळकका, अद तयार कीतवुन पेन इंचि मोळकालय दलगतुर. गानि अवुन तयार कीता पेने बस्केळताहाटीं तल्सकुननालायक मंता, आमीन.

26 अदुनहाटीं पेन ओर्कुन ओरा मनसुंक वाता सिग्गु हिल्वा कबाहक कियालय होळसीता. अस्के मुर्ताहक मुय्दुरतोनि मींडानद होळसि, मुर्ताहकुनतोनि मुर्ताहके मींडसि बस्केने ओप्वा कबाहक कियालय दलगतां.

27 अल्हेने मांडसागुडा ओरा मुत्तोहकुनतोनि मींडानद होळसि, मांडसातोनि मांडसा मुत्तो-मुय्दोनलेहका मींडसि बोगमतनम कियालय दलगतुर. इसौंटा बोगमतनम कीताहाटीं ओर्क ओरा पिस्वरते रोगाल्क-तकलिप वासि सिक्सागुडा दोर्कता.

28 पेनदा सत्तेमता पोल्लेतुन ओर एरपाट कियालय ह्ळा हिल्लुर. अय्ते ओर बद कबळ कियमळ बेस आयो, अदे कबळ कियालय पेन ओर्कुन होळसीता.

29 ओरा लोप्पो अन्नि तीरकुना कराब कबाहक, पगा, आस्ति, सीडातनम निडिस होत्ता. चुगलीं कियमळ, कळक पोतमळ, हक्कमळ, जगडाल्क कियमळ, विरोद कियमळ, नळेह कियमळ इसौंटा गुनम निडिस ओर इंकावरोना बारेमते कराब विचारम कियानोर आतुर.

30 इंकावरोन तेंडसि पोहानोर, पेनदुन हय्सवोर, गर्ग कियानोर, पोंगुळ वळकानोर, कराब पोल्लें पुटिच्चनोर, तल्लुर-बाबोना पोल्ले केंजवोर;

31 बुद्दि हिल्वोर, हीता पोल्लेपोर्रीं ताकवोर, जीवा नोयवोर, दया हिल्वोर आतुर.

32 इसौंटा मनकालोर्कुंक पेनदाहेंदाल हामुरता सिक्सा तप्पो इंचि ओर्क एरपाट मंचिगुडा ओर इल्हे ताकतुर. अचोने आयका अल्हा ताकानोर्कुन “बेस ताकसेक मंतिट,” इंचि मेच्चकुंतुर.

2

मिमेटगुडा पापि लोकुल्क आंदिर

1 अरे तप्पु दोसना लोकुरिटा, मिमेट बोरन्ना आम्टु! मिमेटगुडा अदे तप्पु कियानोर आंदिर. अदुनहाटीं इकावरोन पोरो मिमेट तप्पु दोसमट. इल्हा वेरेतोरपोरो तप्पु दोस्सि, मीवद मिमेटे “दोसिर्क” इंचि हूपिच्छुंतिर. दानहाटीं वेरेतोरपोरो तप्पु दोस्सि मिमेट तपिच्छुना परिर.

2 इसौंटा तप्पु कबाहक कियानोरद पेन सत्तेमते न्यायम कीसि, ओर्क दगता सिक्सा हीता, इंचि मनाकु एरपाटे.

3 अय्ते मिमेटे वेहाट! बव कबाहकुनहेँका मिमेट वेरेतोरपोरो तप्पु दोस्सतिरो, अवे कबाहक मिमेट कीसि, पेनदा सिक्साताल तपिच्छुंतोम इन्कुंचतिरा?

4 हिलाकौंटे दाना दया, ओप्के आनि मापितुन गम्मत इन्कुंचतिरा? निजम बतले इत्ते, मिमेट मनसु मार्सकुनना इंचि पेने मीवापोरो दया हूपिस्ता, इद मीकु तेळियोना?

5 गानि गट्टि मनसु, हेँडुतनमहेँका बस्केने मिमेट मनसु मार्सा हळिर. इल्हा कीसि मीवा सिक्सातुन मिमेटे बेरसागोटसंतिर. बस्के अय्ते पेन दाना होंगुन मीपोरो हूपिचि, मीकु सिक्सा हिय्यार अस्के लोकुल्क दाना सत्तेमता न्यायमतुन हळानुर.

6 आ रोजुने पेन हरेक मनकना न्यायम ओर कीता कबाहकुन हळसि कीता.

7 बोर अय्ते बस्केळक बेसता कबाहक कीसेके, पेनदाहेँदाल कदर, दोसेम हिल्ला पिस्वरतुन दोर्किच्छुनालय हळान्तुरो पेन ओर्क बस्केळक पिस्सना पिस्वर हीता.

8 गानि बोर अय्ते सत्तेमते ताकाकौंटा तप्पुड कबाहक कीसेके सतताहाटीं पिस्संतुर, ओरपोरो पेन होंग आसि सिक्सा हीता.

9 तप्पुड कबाहक कियना हरेक मनकंक तिप्पल्क, दुक्काल्क वांतां. अव्ते मोदाला यहुदिल्कुंक, पजा युनानिर्कुंक.

10 गानि अवे रोजकुने बेसता कबाहक कीसेक ताकानोर्कुंक पेदूदातनम, कदर, सांति दोर्कार. अव्ते मोदाला यहुदिल्कुंक पजा युनानिर्कुंक.

11 बारित्ते पेन मोकम हळसि कबळ किय्यो.

12 मूसाना नियम एरपाट हिल्लोर पापम कीते, मूसाना नियम परकारम सिक्सा आयाकोन्ना गानि सिक्सा अय्ते तप्पो. बोर अय्ते मूसाना नियम एरपाट मंचि पापम कीतुर, ओर्क मूसाना नियम परकारमे सिक्सा आंता.

13 बारित्ते, सिराप मूसाना नियम केंजानोर पेनदा मुन्ने नीतिमंतुल्क आयुर, गानि मूसाना नियम केंजसि दान परकारम ताकानोरे पेनदा मुन्ने नीतिमंतुल्क आंतुर.

14 यहुदि आयवोर्कुंक मूसाना नियम तेळियो. गानि ओक्कला ओरा मनसु मूसाना नियमते वेहताप मनान्यते, ओर्क मूसाना नियम तेळियाकोन्ना गानि मूसाना नियम परकारम ताकतापे आंता.

15 मूसाना नियमकु ओरा मनसुने रासि मंतां इंचि ओर कियना कबाहके हुप्संतां. दीनकु ओरा पिस्वरगुडा गवाइ मंता. बारित्ते ओर तप्पुड कबळ कियनेके ओरा मनसे “इद तप्पु” इंचि दोसेम दोसंता. अल्हेने बेस कबळ कियनेके ओरा मनसे ओर्क “इद बेस” इंचि वेहंता.

16 नना वेहना बेसता कबुर परकारम, बोर्क तेळियाकोंटा मनकालोर्क कीता कबाहकुन पोर्रोटाल, अद रोजुने पेन येसु किरिस्तुनाहेंदाल लोकल्कुना न्यायम किय्यार.

यहुदिल्क आनि ओरा नियम

17 अय्ते इंदके मीवद मिमेट, “मोमोट यहुदिल्क” इंचि वेहकुंतिर, मूसाना नियमपोर्रो विस्वासम ईरतिर, “मोमोट पेनदुक वेल्ले दगोर्कुंम” इंचि पेद्दातनम वेहकुंतिर,

18 मिमेट मूसाना नियम करियसि मंतिर इंचि पेनदा इच्चा बल्हा मंता आनि बेस हरिं बददु इंचि मीकु तेळियता.

19 मिमेट इल्हा इतिर गदा, “गुडिडर्कुनलेसीं मनानोर्कुंक हरिं हुप्संतोम, हीकटा पिस्वर पिसानोर्कुंक वेल्गुनलेसीं मनंतोम.”

20 मूसाना नियमते रासि मत्ता पोल्लेंगें सत्तेम आनि तेल्चि हियानव इंचि मीकु तेळियताहाटीं, “मुर्कालोर्कुंक बुदिदे वेहानोरम, पिलाल्कुंक कराहनोरम,” इंचि मिमेट इनकुंतिर.

21 अय्ते मरि वेरेतोर्कुंक कराहना पोल्लें मीवद मिमेटे बारि कराहकुनिट? “दोंगातनम कियमत” इंचि कराहचि मिमेटे दोंगातनम कीतिर.

22 बोगमतनम कियामन्नि इंचि कराहचि, मिमेटे बोगमतनम कीतिर. बोम्मांक मोळ्का मन्नि इंचि कराहतिर, गुळिते होंचि दोसकुंतिर.

23 महगा मूसाना नियम मंता इंचि पेद्दातनम वेहकुंतिर गानि नियमते ताकका पेनदा कदरगुडा किय्यिर.

24 “मीवा इसोटा कबाहकुनहेंका यहुदि आयवोरा नड्डुम पेनदा अपमानम आंता,” ☆ इंचि दर्मसास्त्रमते रासिगुडा मंता.

25 मिमेट मूसाना नियम परकारम ताकानय्ते, कतना* कीतद मीकु पायदा आंता. गानि मिमेटगिंटा मूसाना नियम परकारम ताकाकौंटे मिमेट कतना कीसिगुडा बतल पायदा हिल्ले.

26 बोरन्ना कतना कियवोर गिंटा मूसाना नियम परकारम ताकते, ओर कतना कियाकोन्नागानि पेनदा नदरते कतना कीतोना लेक्कातेन वांतोर.

27 मूसाना नियम मिहगा मंचि दाना परकारम कतना आसिगुडा मिमेट नियम परकारम ताकसेक हिल्लिर. अदुनहाटीं बोरद अय्ते कतना आयाहिल्ले, यहुदि आयवोर, मूसाना नियम मत्ताप ताकानोर मीपोर्री दोसेम दोस्सनुर.

28 सिराप यहुदि जातिते पुटतोर, पलाताल कतना आतोर ईर निजम यहुदि मनकालोर आयुर.

29 बोर अय्ते पेनदा इच्चा मत्ताप ताकंतुर ओरे निजम यहुदिल्क आंदुर. मूसाना नियम परकारम पलाताल आतदे कतना आयो, गानि पेनदा आत्माहेंदाल मनसु मारियता मनकालोरे निजम कतना आता यहुदिल्क आंदुर. इसंटा मनकालोर लोकुल्कुना कदरतुन आयो गानि पेनदा कदरतुन पहकंतुर.

3

हीता पोल्लेताल पेन पजोळ्क होन्नो

1 इद केंजसि, “अय्ते यहुदि आसि बतले पायदा हिल्लेना? कतनाकु इच्चोगुडा विलवा हिल्लेना?” इंचि मिमेट इनकुंतिर बारे.

2 विलवा अय्ते वेल्लेने मंता. अद बल्हा इत्ते, पेन दाना पोल्लेन* मोट्टा मोदाला यहुदिल्कुंके हीता.

3 यहुदिल्कुना लोप्पो पेनदा पोल्ले केंजवोर इच्चुर मत्तुर. ओर अल्हा मत्तुर इंचि पेन विस्वासमतद आयो इनकुंचंतिरा?

4 अल्हा आयापर्री. लोकुल्क अंतोर आबद्दम वळकानोर आयिना, पेन मात्रम बस्केळ्क निजम मनंता. बारित्ते दर्मसास्त्रमते, “निमे वळकते नीवा पोल्ले निजम इंचि दिस अरंता, निमे न्यायम कियनेके नीवा पोल्ले गेल्लंता,”

* 2:25 कतना यहुदि आनि मुसलमान लोकुल्कुनद उंदि रिवाज आंद. इद रिवाज परकारम उळकानगटा कोस्सा तोलदुन कोय्यांतुर. इसंटा रिवाज कीते पेनदातोनि करार कीताप इंचि ओर नम्मंतुर. * 3:2 पोल्ले मूसाना नियमते मनना आनि पोल्ले इत्ते दर्मसास्त्रमते मत्तव आनि पोल्ले.

इंचि रासि मंता.☆

5 मना तप्पुड कबाहकुन हळसि पेन बच्चोरो नीतिमंतुड इंचि एर्का आंता. इल्हा आतास्के पेन मनाकु सिक्सा हीसि अन्यायम कीसंता इंचि मनम इनकुना परंतोम. (इद नना मनकना विचारम मत्ताप वळकसंतन.)

6 गानि अल्हा इनकुनमळ तप्पु आंद, अल्हा गिंटा पेन कीते, अद दुनियातोरा न्यायम बल्हा किय्यार?

7 अचोने आयका, “मावा तप्पुड कबाहकुनहेंदाल पेने सत्तेमतद इंचि तेळियसि दाना कदरगुडा वेल्लेन आसेके अय्ते, पेन माकुन पापिक बल्हा इना परंता?” इंचिगुडा इच्चुर लोकुल्क लोल्लि कीतुर.

8 इल्हा कियानोर, “पापम कीते बेस जर्गसेक गदा! अय्ते दट पापम कीकोम,” इंचिगुडा इंतुर. इंका इल्हा मोमोटे कराहतोम इंचि इच्चुर लोकुल्क मापोर्रो दोसेमगुडा दोसंतुर. गानि अल्हा कियानोर अंतोर्कुंक, पेन दगता सिक्सा हींता.

पापम हिलाकोटा बोरे हिल्लुर

9 सरे! अय्ते मनम यहुदिल्कुम, यहुदि आयवोरकन्ना बेसतोर्कुमा? असले आयोम. बारित्ते यहुदिल्क आयिर, युनानिर्क आयिर. अंतोर पापम कीतोरे इंचि नना मीकु मुन्नेन वेहचि मत्तन.

10 दर्मसास्त्रमतेगुडा इदुना बारेमते इल्हा रासि मंता गदा:
“बोरे नीतिमंतुड हिल्लोर, वरोरगुडा हिल्लोर.

11 निजम तेळियतोरे बोरे हिल्लुर, वरोरगुडा हिल्लोर.
पेनदुन पहकानोर बोरे हिल्लुर.

12 अंतोर पेनदा निजम हरदाल तप्पि तप्पुड हर्दुक होत्तुर.
कबळक ओज्जनलायक बोरे हिल्लुर,

बेसता कबळ कियानोर बोरे हिल्लुर, वरोरगुडा हिल्लोर.☆

13 ओरा तोळदाल पेय्सना पोल्लें,

बोदा कुल्ला मत्ते पीनगुना गब्बु बल्हा वांता अल्हा मंतां.

ओरा तोळदाल पेय्सना पोल्लें, इंकावरोन मुळाहनव आंदु.☆

तरासुना विसम वरोन बल्हा हळ्कंता,

अल्हेन ओरा पेदविनाल पेय्सना पोल्लें तकलिप कियानव आंदु.☆

☆ 3:4 बजन संहिता 51:4 ☆ 3:12 बजन संहिता 14:1-3 ☆ 3:13 बजन संहिता 5:9

☆ 3:13 बजन संहिता 140:3

- 14 ओरा पोल्लें सापनेम आनि कयमुलतोनि निंडिस मंतां.☆
- 15 ओर बस्केळ्ळक इंकावरोन हळ्कालय हळसेक मनांतुर.
- 16 ओर बगा अय्ते दांतुर अगा नासडेम कीसि दुक्कमतुन हीसि दांतुर.
- 17 सांति बगा दोर्कता अद हरि ओर्क एरपाट हिल्ले.☆
- 18 ओरा कळकुना मुन्ने पेनदा वेंरे हिल्ले.”☆
- 19 मूसाना नियम परकारम बोर अय्ते ताकंतुर ओराहाटीगे मूसाना नियम मंता, इद मनाकु एरपाटे. अयना पेन न्यायम कियनेके दुनियातोर अंटोर, इत्ते यहुदिल्क आयिर यहुदि आयवोर आयिर, अंटोर पेनदुक लेक्का हियमळे, बोरे तपिचकुना पस्स.
- 20 मूसाना नियमता कबळताहेंदाल मनम अंटोरम पापिर्के इंचि तेळियंता अचोने. गानि अवटे वेहचि मत्ताप ताकसि पेनदा मुन्ने बोरे नीतिमंतुल्क आयुर.

पेन मनकालोर्कुन नीतिमंतुल्क कीता

- 21 गानि इंदके मूसाना नियमते रासि मत्ता पोल्लेंगे कियवा मनकालोर्कुन नीतिमंतुल्क कियनाहाटी पेन इंकुंदि हरि तयार कीता. अद हरदा बारेमते, मूसाल आनि पेनदा कबुरतोर पोल्ले हीसि मुन्नेन दर्मसास्त्रमते रासि इरतुर.
- 22 अद हरि बतल इत्ते, बोरे आयिर येसु किरिस्तुनपोर्गे विस्वासम इरते पेन ओर्कुन नीतिमंतुल्क कीता. इवटे कुलम, जाति इल्हा बतल हिल्ले.
- 23 बारित्ते अंटोर लोकुल्क पापम कीसि, पेनदाहेंदाल दोर्कना कदरताल लक्कु आतुर.
- 24 गानि येसु किरिस्तु लोकुल्कुन पापालकुनाल इळबळिस्तोर. इल्हा पेन दाना कुर्पाति येसु किरिस्तुन विस्वासम कियानोर्कुन अंटोर्कुन नीतिमंतुल्क कीता. दीनाहाटी मनम पेनदुक बतल हियना अवसरम हिल्ले.
- 25-26 मना पापालकुना सिक्सातगा मोक्कु आयालय पेन येसुन लोहता. येसु किरिस्तु मना पापालकुनाहाटी मोक्कु आतोर इंचि मनम विस्वासम कीसि ओष्कुनगोम. दीनहेंदाल येसुनपोर्गे विस्वासम कीतोर्कुन पेन नीतिमंतुल्क कीता. इदवेरदाका बोर अय्ते पापम कीतुरो, ओर्क सिक्सा हियाकौटा पेन ओष्के पीसि मत्ता. इल्हा अद नीतिमंतुड इंचि हुपिस्ता.

27 अदुनहाटीं मनम पेदिदरकेम कियामन्नि. मनम पुन्नेम कबाहक कीतोम इंचि पेन मनाकुन नीतिमंतुल्क कीतना? हिलाकोटे मूसाना नियमपोर्रो ताकताहेकेना? विस्वासम कीताहेकेन मनम नीतिमंतुल्क आतोम.

28 मूसाना नियमते मत्ताप ताकताहाटीं पेन मनाकुन नीतिमंतुल्क इना हिल्ले, गानि येसु किरिस्तु सामिनपोर्रो विस्वासम कीताहेकेन नीतिमंतुल्क इत्ता.

29 अय्ते दीना अर्तम मिमेटे विचारम कीसि वेहाट. पेन सिराप यहुदिल्कुनदेना? यहुदि आयवोर्कुनद आयोना? पेन यहुदि आनि यहुदि आयवोर, इव्वुरदगुडा आंद.

30 अद बल्हा इत्ते, पेन उंदे आंद. कतना आतोर आयिर, कतना आयवोर आयिर, इव्वुर्कुनगुडा पेन ओरा विस्वासमहेंदाले नीतिमंतुल्क कीता.

31 “अल्हा अय्ते, विस्वासम कीताहेका मनाकु मूसाना नियमता अक्केर हिल्ले, इनकुंचंतिरा?” अल्हा आयो. विस्वासमहेंदाले मूसाना नियमते मनम बेस ताका परंतोम.

4

अब्राहामुना विस्वासम

1 इंदके मना एनकटा पेद्दा मनकल अब्राहामुना बारेमते मनम बतल इनकोम? ओर नीतिमंतुड बल्हा आतोर?

2 ओक्कला अब्राहाम कीता बेसता कबाहकुनहेका पेन ओन नीतिमंतुड इंचि मत्ते, गर्रा कियालय ओनगा बतलन्ना कारनम मंचि मनवळ, गानि पेनदा मुन्ने ओर अल्हा किया परोर.

3 दर्मसास्त्रम बतल वेहांता इत्ते, “अब्राहाम पेनदुन विस्वासम कीतोर, ओना विस्वासमतुन हूळसि पेन ओन ‘नीतिमंतुड’ इंचि वेहता.”☆

4 कबळ कियानोंक दोर्कनद कूलि आंद, दान इनाम इन्नुर. ओर कबळ कीतोर, इंचि अद ओन्क दोर्कता.

5 गानि पेनदा मुन्ने बोरे मनकल बेसता कबाहक कीसि नीतिमंतुड आयोर. पापिर्कुनगुडा मापि कियना पेनदापोर्रो विस्वासम इरतेने, अद ओन नीतिमंतुड कीता.

6 कबाहक कियाकोन्नागानि, पेन बोर्कुन अय्ते नीतिमंतुल्क इता, ओर आसिर्वाद दोर्कतोर आंदुर इंचि दाविदगुडा इंतोर. अद इल्हा मंता:

7 “बोरा तप्पु कबाहकुन पेन मापि कीता, बोरा पापाल्कुन मुच्चुता, ओर पेनदा आसिर्वाद दोर्कतोर आंदुर.

8 बोरु पापालकुना लेक्का पेन पिर्यो, ओर आसिर्वाद दोर्कतोर आंदुर.”

9 अय्ते, इसौटा आसिर्वाद सिराप कतना आतोर्कुनाहाटीगेना मरि कतना आयवोरहाटीगुडा मंताना? हो, इव्वुराहाटीगुडा मंता. बारित्ते मना एनकटा पेद्दा मनकल अब्राहामुन पेन ओना विस्वासमतुन ह्ळसि नीतिमंतुड इंचि ओप्कुत्ता, इल्हा मनमे वेहांतोम गदा!

10 अय्ते पेन अब्राहामुन बस्के नीतिमंतुड इंचि इत्ता? कतना आतारित्तेना, कतना आयाका मुन्नेन्ना? कतना आयाका मुन्नेन ओन नीतिमंतुड इंचि इत्ता.

11 अब्राहामुना कतना आयाका मुन्नेन ओर पेनदुन विस्वासम कीतोर. अदुनहाटी पेन ओन नीतिमंतुड इत्ता. नीतिमंतुना एपाटता चिन्ह इंचि अब्राहामुंक कतना किया पीता. अदुनहाटी विस्वासम कियानोर अंतोर कतना आयाकोन्नागुडा नीतिमंतुल्क आसि मंतुर. अदुनहाटी ओर, अंतोर विस्वासुल्कुना बाबोनलेसी मंतोर.

12 कतना आतोर्क अंतोर्कगुडा अब्राहाम मातिर दादले. गानि सिराप कतना आता इंचि ओर्क अब्राहाम मातिर दादल आया हिल्लोर. अब्राहामुना कतना आयाका मुन्ने ओना विस्वासम बल्हा मत्ता, अल्हेन ओर्कगुडा विस्वासम मत्ता इंचि अब्राहाम ओर्क मातिर दादल आतोर.

13 “मीकुन ई दुनियाता वारसदार्क कीतन,” इंचि पेन अब्राहाम आनि ओना वंसमतोर्क पोल्ले हीसि मत्ता. अब्राहाम मूसाना नियमते वेहताप ताकतोर इंचि पेन ओन्क पोल्ले हिया हिल्ले. गानि पेनदापोरौ ओर विस्वासम कीसि नीतिमंतुड आतोर इंचि पेन ओन्क ई पोल्ले हीता.

14 ओक्कला मूसाना नियम परकारम ताकतोर, पेन हीता पोल्ले परकारम वारसदार्क आयानय्ते, विस्वासम इनना पोल्लेक बतले विलवा मन्नो, पेन हीता पोल्लेकगुडा अर्तम मन्नो.

15 पेन नियमकु हीतस्के अवुन पीसि ताका पीता. ताकाकौंटे पेन सिक्सा हीता. गानि नियमकु हिलाकौंटे अवुन नेम्हना सवालगुडा वायो.

16 अदुनहाटी पेन अब्राहामुना वंसमतोर्क अंतोर्क हीता पोल्ले विस्वासम कीतोर्कुंक दाना कुर्पाताहेंदाले दोर्कता. इद सिराप मूसाना नियम परकारम ताकानोर्कुके आयो गानि अब्राहामुनलेसी विस्वासमते ताकानोर अंतोराहाटी मंता. ओर मना अंतोरा बाबल आंदुर.

17 “नना नीकुन वेल्ले लोकुल्कुना बाबो कीतन,”✧ इंचि पेन अब्राहामुना

बारेमते इत्ता पोल्ले दर्मसास्त्रमते रासि मंता. पेनदा मुन्ने अब्राहाम मना अंटोर्क बाबोनलेसीगे मंतोर. हातोर्कुन पेन मर्ग जीवाते तेहंता. हिल्वदुनगुडा पुट्टींचंता असोटा पेनदुन अब्राहाम विस्वासम कीतोर.

18 अब्राहामुंक पिलाल्क आयना आसे हिलाकोन्ना, ओर पेनदापोरों विस्वासम कीतोर. अदुनहाटी पेन ओन वेल्ले लोकुल्कुना बाबो कीता. “नीवा वंसंमताहेंदाल लेक्का हिल्वा लोकुल्क आंतुर,” इंचि पेन वेहता परकारमे जर्गता.✧

19 अस्के अब्राहामुना वयम नूर वर्सां मत्ताहाटी ओना मेंदुल कमजोर आसि मत्ता. अल्हेने ओना मुत्तो सारांकु पिलाल्क आयना वयम दाटसि होत्ता. इवन्नि एरपाट मनिनागानि ओर विस्वासमते कमजोर आयाकौटा गट्टिगा मत्तोर.

20 अब्राहाम पेन हीता पोल्लेपोरों बस्केने अनमानम किया हिल्लोर, गानि पेनदा विस्वासमते गट्टिगा आसि दाना महिमा कीतोर.

21 पेन ओन्क हीता पोल्ले, अद पूरा किया परांता इंचि अब्राहामुंक पुरागा बरोसा मत्ता.

22 इद पोल्लेताहाटीगे, “पेन ओन नीतिमंतुड इत्ता.”✧

23 विस्वासमहेंदाल नीतिमंतुड कीता पोल्ले सिराप ओनाहाटीगे हिल्ले.

24 गानि अद मनाहाटीगुडा मंता. हातोरव्टेडाल येसु सामिन मर्ग जीवाते तेहता पेनदुन मनम विस्वासम कीतोम, इंचि अद मनाकुनगुडा नीतिमंतुल्क इंता.

25 मना पापाल्कुनाहाटी हायालय, पेन येसुन वेंरेतोर कय्दे अप्पजेपता, आनि मनम पेनदा मुन्ने नीतिमंतुल्क आयालय ओन मर्ग हातोर लोप्पोटाल जीवाते तेहाता.

5

पेनतोनि सत्तेमते मनमळ

1 इल्हा, मना विस्वासमहेंदाल पेन मनाकुन नीतिमंतुल्क कीता. अदुनहाटी सामि येसु किरिस्तुनाहेंदाल, पेनतोनि मनक सांति मंता.

2 इंदके मनम पेनतोनि कलियसि पिस्सना पिस्वरगुडा पेनदा कुर्पातेन दोर्कतद आंद. अचोने आयाका पेनदा महिमाता वेलगुने मनम उंदि रोज मनांतोम इत्ता आसेते वेल्लेन कूस मंतोम.

3 इच्चोने आयाका, विस्वासम कीताहेंका मनाकु तिप्पल्क वायिनागानि वेल्ले कुसिते मनंतोम. बारित्ते तिप्पल्क वातेने ओप्के पुट्टंता.

4 इल्हा ओप्के पीसि मत्ते मनालोप्पो बेसता गुनम वांता. बेसता गुनम मनाकु मुक्ति हियाना आसे पुट्टिचंता.

5 इद आसे मनाकुन नाराज किय्यो, बारित्ते पेन दाना पवित्र आत्मातुन मना पिस्वरते हीसि, अद मनाकुन वेल्लेन पावरम कींता इंचि हुपिस्ता.

6 बस्के अय्ते मनद मनम पिसागोटकुना पराकौंटा आतोम, असौंटा वेलाते मना पापि लोक्कुलकुनाहाटीं किरिस्तु ओना जीवा हीतोर.

7 वरोर नीतिमंतुनाहाटीं बोरन्ना जीवा हिय्यालय तयार मनमळ वेल्लेने कस्टम, गानि वरोर बेसता मनकनाहाटीं बोरन्ना जीवा हिय्यालय तयार आया परांतुर आयावच्चु.

8 गानि मनम इंका पापमतेन मत्तोम, अस्केने किरिस्तु मनाहाटीं जीवा हीतोर. इदुना हेंदाल पेन मनापोरौं बच्चोन पावरम कींता इंचि दिसंता.

9 येसु सामिना नेत्तुरहेंदाल पेन मनाकुन नीतिमंतुलक कींता. अदुनहाटीं पेनदा होंगुनाल मनाकुन तप्पाकौंटा ओनाहेंदाले पिसागोटमळ जर्गीता.

10 उंदास्के मनम अंतोरम पेनदा पगातोरमे मत्तोम. अल्हा मननैकेगुडा अद दाना मरिना जीवातुन हीसि मनाकुन दाना दगैर्के कीकुत्ता. इंदके अय्ते मनम पेनतोनि कलियसि मंतोम. अदुनहाटीं किरिस्तुना पिस्वरताहेंदाल अद मनाकुन आकिर सिक्साताल तप्पाकौंटा कापाळंता.

11 सिराप इच्चोने आयो गानि मना सामि येसु किरिस्तुनाहेंदाल मनम पेनतोनि मर्रा कलियतोम, अदुनहाटीं मनम वेल्लेन कुसिते मंतोम.

आदाम आनि येसु

12 इद दुनियाते पापम आदामुनाहेंदाल वाता. पापमताहेंदाल हामुर वाता. दुनियाता अंतोर लोक्कुलकुगुडा पापम कीतुर, अदुनहाटीं अंतोर्के हामुर वाता.

13 मूसाना नियम वायका मुन्नेन इद दुनियाते पापम मत्ता. गानि अस्के मूसाना नियमकु मनवाहेंका पापमतुन पेन लेक्का किया हिल्ले.

14 अय्नागानि आदामुनस्केटाल अय्ते मूसाना कालमदाका मनकालोरपोरौं हामुर राज्येम कीसैकेन मत्ता. आदाम पेनदा पोल्लेपोरौं ताका हिल्लोर. लोक्कुल पेनदा पोल्लेपोरौं ताकका ओनालेसीं पापम किया हिल्लुर, अय्नागानि लोक्कुल हायुंदुर. ईर आदाम इत्ते मुन्ने वायाना किरिस्तुना चिन्हालेसीं मंतोर.

15 गानि पेनदा वरम आनि आदामुना पापम, इव रौंड पोल्लेन नड्डुम मात्रम वेल्लेन परक मंता. वरोर कींता पापमहेंदाल वेल्लेन मंदिक हामुर वाता. गानि

दानकन्ना एक्को पेनदा वरम* आनि कुर्पा मंता. ई कुर्पा येसु किरिस्तुनाहेंदाल वेल्लेन मंदिक दोर्कता.

16 पेन हीता वरम आनि आदाम कीता पापमता पलम, इव रोंड पोल्लें उंदेतीर हिल्लें. बारित्ते आदामुना पापम अंटोरपोर्गे सिक्सातुन तत्ता. गानि मनम वेल्लेन पापाल्क कीसिगुडा पेन हीता वरमनाहेंदाल नीतिमंतुल्क आतोम.

17 आदाम कीता पापमताहेंदाल अंटोर हामुरता कय हिळु मंतुर. गानि इंकावरोर इत्ते येसु किरिस्तुनाहेंदाल बोर्क अय्ते पेनदा वरम आनि कुर्पा दोर्कता, ओर्क अंटोर्क पेनदुक नच्चना नीति पिस्वर दोर्कता.

18 इल्हा आदाम कीता पापमताहेंदाल अंटोर लोकुल्कुं सिक्सा दोर्कता. अल्हेने इंकावरोर इत्ते येसु किरिस्तु कीता बेस कबाटाहेंदाल, पेन अंटोर्क नीतिमंतुल्क आयालय उंदि हरि तयार कीसि ओर्क बस्केळ्क पिस्सना पिस्वर हीता.

19 वरोर आदाम पेनदा पोल्ले केंजवाहेंका वेल्लेन लोकुल्क पापिर्क आतुर. अल्हेने इंकावरोर मनकल इत्ते येसु किरिस्तु पेनदा पोल्ले केंजताहेंका, वेल्लेन लोकुल्क नीतिमंतुल्क आंतुर.

20 लोकुल्क बल्हा इग्गा पापम कीसेक होंचंतुर अदुन ओर्क हुप्सनाहाटीं मूसाना नियम वाता. गानि लोकुल्क बच्चोन वेल्ले पापम कीसेक होत्तुर अचोने वेल्ले कुर्पा पेन कीसेक होत्ता.

21 इल्हा बारि आता इत्ते, बल्हा पापम हामुरताहेंदाल राज्येम कीसेक मत्ता, अल्हेने पेनदा कुर्पागुडा सत्तेमतोनि मना सामि येसु किरिस्तुनाहेंदाल बस्केळ्क पिस्सना पिस्वरताहाटीं राज्येम कीता.

6

पापमहेंदाल हामुर आनि किरिस्तुनाहेंदाल पिस्वर

1 अय्ते मरि बतल इनकोम! पेन मनापोर्गे वेल्लेने कुर्पा कियाना इंचि पापम कीसेकेन दाकोमा?

2 बस्केने कियामन्नि. पापि गुनाल्कुनाल उंदि मल्का मनम बस्केळ्ताहाटीं वेरे आसि हासोत्ताप आतोम. मर्रा असोंटा पापि गुनाल्कुने बल्हा पिसकोम?

3 मनम अंटोरम येसु किरिस्तुनतोनि कलियतोम इंचि हुप्सालय बापतिस्मा एततोम. अस्केने मनम ओनतोनि हाताप आतोम. इद संगति मीकु तेळियोना?

* 5:15 पेनदा वरम मना पापाल्क मापि आतां. इत्ते पेन मनाकु उंदि पेद्दा इनाम हीता.

4 बापतिस्माहेंदाल मनम येसु सामिनतोनि हासि बोंदा दोसताप आतोम. बल्हा अय्ते पेनबाबाना महिमाता ताकतते किरिस्तु हामुरताल मर्रा जीवाते तेदतोर, अल्हेने मनमगुडा बापतिस्मा एतसि पूना पिस्वरते ताका परांतोम.

5 बारित्ते मनमगिंटा ओना हामुरते ओनतोनि उंदि आते, ओना मर्रा जीवाते तेदमळतेगुडा मनम ओनतोनि तप्पाकोंटा उंदि आंतोम.

6 मना पडना पिस्वर येसुनतोनि क्लसुनपोर्रो हाता, अदुनहाटी पापमतोनि निडिस मत्ता मना गुनम नासडेम आसि होत्ता. इंदके मनम पापमता अदिकारमते हिल्लोम इद मनाकु एरपाटे.

7 बोर अय्ते पडना पिस्वरतुन हाताप होळसीतोरो, ओर ओना पापाल्कुनाल मुक्ति दोर्किसि नीतिमंतुड आतोर.

8 ओक्कला मनम किरिस्तुनतोनि हायानय्ते ओनतोने मनम पिसंतोम इंचि मनाकु विस्वासम मंता.

9 किरिस्तु हामुरताल मर्रा जीवाते तेदतोर, ओर मर्रा बस्केने हायोर. अचोने आयका हामुरता ताकत ओन बस्केने बतल किया पर्रो, इद मनाकु एरपाटे.

10 पापमता अदिकारमतुन ओळिच्चनाहाटी ओर उंदे मल्का हातोर. गानि ओर इंदके पिस्सना पिस्वर मात्रम पेनदाहाटी पिस्सेक मंतोर.

11 इल्हा मिमेटगुडा पापमताहाटी हातोरलेहका मंचि, पेनदाहाटी येसु किरिस्तुने जीवाते मंतोम इनकुंटु.

12 अदुनहाटी रोंड रोजकु पिस्सना मीवा पिस्वरते पापमता राज्येम वायाकोंटा जेगर्ता मंटु. इंका दाना सेड्डा आसेनाल लक्कु मंटु.

13 मीवा मेंदुलतुन सेड्डा कबाहक कियालय पापमता कय्दुक हियमट. अल्हा कियाकोंटा, “मनम हामुरताल जीवाते तेदतोरम,” इद पोल्लेतुन मति कीसि, मीपोर्रो पेनदुक अदिकारम हीम्टु आनि मीवा मेंदुलतुन नीति कबाहक कियनाहाटी पेनदुक अप्पजेप्पट.

14 अस्के मिमेट मूसाना नियमता कय्दा हिळु हिल्लिर गानि पेनदा कुर्पाते पिस्सेक मंतिर इंचि मीपोर्रो पापम दाना अदिकारम ताकसो.

सत्तेमता सेवा कियना

15 इंदके पेनदा कुर्पा मनाकु दोर्कताहाटी मनम मूसाना नियमता कय्दा हिळु हिल्लोम, अय्ते इंदके मनम पापम कीकोमा मरि? अल्हा बस्केने कियामन्नि.

16 सेवा कीतन इंचि मीवद मिमेट ओप्कुल्ले मिमेट बा मालकुनगा अय्ते सेवा कीसंतिरो, ओक्क मिमेट निजमे दासुल्क आंतिर. इद पोल्ले मीकु तेळियोना? मिमेट

पापमता दासुल्क आते अद मीकु हामुरता हरिं हुप्संता. गानि मिमेट पेनदा पोल्ले केजते अद मीकुन नीतिमंतुल्क कीता.

17 मुन्ने मिमेट पापमता दासुल्के मत्तिर, गानि मीकु एल्ता पेनदा पोल्लेन मिमेट बेस केंजसि, करियसि इंदके अखुन पीसि ताकसंतिर. इंचि पेनदुक नना दन्यवाद कीतन.

18 इंदके पेन मीकुन पापमता कय्दाल होळसीता इंचि मिमेट सत्तेमता कबाहक कियालय पेनदा दासुल्क आतिर.

19 इव पोल्लेन अर्तम कीकुनना ताकत मीकु हिल्ले इंचि नना उंदि उदाहरन हीसि मीकु वेहासेके. दीनकन्ना मुन्ने मिमेट मीवा मेंदुलतुन रोता कबाहक, तप्पुड कबाहक कियालय अप्पजेपसि मत्तिर. दानहेंदाल वेल्लेन पापम आता. अल्हेने इंदके मिमेट मीवा मेंदुलतुन सत्तेमता कबाहक कियालय अप्पजेप्पट, अस्के मिमेट पेनदा पवित्र लोकुल्क आकिट.

20 मिमेट बस्के अये पापमकु दासुल्क आसि मत्तिर अस्के मीपोर्रो नीतिता कबाहक कियालय दबाव मनाहिल्ले.

21 अयना मिमेट कीता कबाहकुनाहाटीं इंदके मीकु सिग्गु वासंता. मिमेट अव कीतस्के मीकु बतल इनाम दोर्कता? अव कबाहकुनाहेंदाल सिराप हामुरे दोर्कुदु.

22 गानि इंदके पेन मीकुन पापमता कय्दाल होळसीताहेंका मिमेट दाना दासुल्क आतिर. अदुनहाटीं इंदके मीकु दोर्कना इनाम बतल इत्ते, पेन मीकुन दाना पवित्र हर्दे ताक्किचि, आकिरते बस्केळक पिस्सना पिस्वरताहेके ओता.

23 पापि कबाहकुना कूलि इंचि मनाकु हामुर दोर्कता. गानि पेन मनाकु मना सामि येसु किरिस्तुनहेंदाल वरम इंचि बस्केळक पिस्सना पिस्वर हीता.

7

मरमिना उदाहरन

1 विस्वासुल्कुनिटा, नना मूसाना नियम तेळियसि मत्तोरतोनि वळ्कसेक मंतन. वरोर मनकल जीवाते मत्ताचुं रोजके ओनपोर्रो मूसाना नियमता अदिकारम मनंता इंचि मीकु तेळियोना?

2 सरे, उंदि उदाहरन वेहांतन. मूसाना नियम परकारम उंदि मुरतळ दाना मुय्दो पिस्सि मत्ताचुं रोजके अद ओना मुत्तो आसि मनंता. गानि दाना मुय्दो हासोत्ते, मूसाना नियम परकारम अद मुरतळ मुय्दो संबंदिस्ता नियमताल इळबळंता.

3 दाना मुय्दो जीवाते मननैकेन अद वेरे बोनतोनना मरमिं आते, दान बोगमतनम कीता मुरतळ इंतुर. गानि दाना मुय्दो हासोननय्ते मात्रम आ नियमताल अद पलाते अर्रता. अद वेरे मरमिं अय्नागानि दान बोगमतनम कीता इंचि इन्नुर.

4 अय्ते विस्वासुल्कुनिटा, इल्हेन मिमेटगुडा बस्के अय्ते किरिस्तुनतोनि हातिर अस्के मूसाना नियमताल इळबळतिर. इंदके बोर अय्ते हातोरवेटाल मर्रा जीवाते तेदतोर आ किरिस्तुनतोनि मिमेट कलिया परंतिर. दीनहेंदाल मनम पेनदा सेवाताहाटी बेसता कबाहक किया परांतोम.

5 मुन्ने मनम मना इस्ट परकारम ताकुंदुम अस्के मना मेंदुलतुन मनलोप्पो मत्ता पापि आसैं वाळकुनुंदुं, मूसाना नियम मनाकु तेळियतस्के आ आसैं इंका बेरस्सेक होत्तां. दीनहेंदाल मनाकु हामुर दोर्कता.

6 मनम बद नियमते अय्ते दोह्चि वाटताप मत्तोमो, आ मूसाना नियमताहाटी इंदके मनम हासि, अवेटाल पलाते अरतोम. दानहाटी मनम आ रासि मत्ता पडना नियम परकारम इंदके पिस्सेक हिल्लोम. गानि पेनदा आत्मा हुपिस्ता पूना हर्दुन एरपाट कीसि अद वेहताप ताकसेके दाना सेवा कीसंतोम.

मूसाना नियम आनि पापम

7 अय्ते मूसाना नियम तप्पु इंचि नना वेहसेक इन्कुंचितिरा? अल्हा असले आयो. ओक्कला मूसाना नियम हिलाकोंटा मंचि मत्ते, असल तप्पु बतलो नाकु बस्केने तेळियाकोनवळ. ओक्कला मूसाना नियम, “वेरेतोर दानपोर्रो आसे पळमा,” इंचि वेहाकोंटा मंचि मत्ते, आसे पळमळ तप्पु इंचि नाकु ✨तेळियाकोनवळ.

8 गानि पापम, मूसाना नियमते मत्ता आदेसकुन वाळकुंचि नावा लोप्पो अन्नि तीरकुना तप्पुड आसैं पुटिस्ता. मूसाना नियम हिलाकोंटे पापमकु जीवा हिलवापे.

9 दीनकन्ना मुन्ने मूसाना नियमतुन एरपाट कियाकोंटेन पिस्सेक मत्तन. गानि बस्के अय्ते मूसाना नियमते मत्तव अन्नि आदेसकु* नाकु तेळियतां, अस्के नावा लोप्पो पापम कबळ कियालय दल्लिसि, नना पेनदा मुन्ने हासोत्ताप आतन.

10 बद आदेस अय्ते नाकु पिस्वर हियानद मत्ता, अदे आदेस नाकु हामुर हीता.

11 पापम मोका हळसि आदेसतुन वाळकुत्ता, नाकु दोका कीता. पजा अदे पापम नावा पिस्वरतुन नासडेम कीता.

12 गानि मूसाना नियम पवित्रमातद आंद. अवटे रासि मनना आदेसाल्कगुडा पवित्र, नीतितव आनि बेसतव आंदुं.

✨ 7:7 निर्गमन 20:17 * 7:9 आदेस आदेस इत्ते सिनाइ गुट्टापोर्रो मूसांक पेन हीता पदि पोल्लें आंद.

13 अल्हा अय्ते आ पवित्रमाता बेस आदेसकुनाहेंदाले नाकु हामुर वाता इंचंतिरा? अल्हा असले आयो. आ पवित्रमाता आदेसकुन वाळकुंचि पापम नाकु हामुरतुन हीता. अल्हा कीसि अद दाना असल रूपमतुन हुपिस्ता. पापम इत्ते बच्चोन कतरनाक आंद इंचि आ आदेसकुनाहेंदाल नाकु पुरागा तेळियनाहाटीं अल्हा आता.

मनकना परिस्तिती

14 बारिल्ले मूसाना नियम पेनदाग्टद आंद इंचि मनाकु एरपाट मंता. गानि नना पापि आसेने निडिस मत्ताहेंका पापमता सेवा कियनाहाटीं अम्मूळ होत्तोन आंदुन.

15 नना बतल कीसंतनो नाके तेळियसेक हिल्ले. नना बतल अय्ते कियगोमो, अद बारे कीसेक हिल्लेन आनि बद अय्ते कियमन्नो, अदुन बारे कीसंतन.

16 नना बतल अय्ते कियमन्नो अदुने नना कियानय्ते, मूसाना नियम बेसतद इंचि नना ओष्कुंतन.

17 गानि कियामन्नि इत्ता कबाह्कुन कियानोन नना आयोन, नाकुन अल्हा किया वेहानद नावा लोप्पो मनना पापम आंद.

18 नावा लोप्पो बदे बेसता पोल्ले हिल्ले इंचि नाकु एरपाटे मंता. बद अय्ते बेसतदो अदे कियना इच्चा नाकगुडा मंता, गानि अल्हा किया परसेक हिल्लेन.

19 बव अय्ते बेसता कबाह्को अवे नना कियना इनकुंतन, गानि अव नना किय्योन. बव तप्पुड कबाह्क अय्ते कियना आयो इंचि इनकुंतनो, अवे तप्पुड कबाह्क नना कीतन.

20 गानि नना बव कबाह्क अय्ते कियानायो अवे कबाह्क कियानय्ते, आ कबाह्क कियानोन नना आयोन गानि नावा लोप्पो मनना पापम आंद नाकुन किया वेहानद.

21 अदुनहाटीं नना बस्के अय्ते बेसता कबाह्क कियालय हूळंतन, अस्के नावा लोप्पो मनना कराब गुनाल्क अल्हा कियालय नाकुन आपंतां.

22 पेन हीता नियमते नावा मनसु वेल्लेन कूस मंता.

23 गानि नावा मेंदुलपोर्री मात्रम इंकुंदि बदो वेरे नियम अदिकारम ताकिस्ताप नाक दिस्सेक मंता. आ नियम, नावा बुद्दिदे मनना मूसाना नियमतोनि लडाइ कीसि नाकुन पापमता कय्दे अप्पजेपसंता.

24 अय्यो, नना बच्चोन गोसाते मंतन! हामुरता कय्दा हिळु मनना नावा ई पापि मेंदुलताल नाकुन बोर होळसा परंतोर?

25 मना सामि येसु किरिस्ते नाकुन होळसा परांतोर, नना पेनदुक दन्यवाद कीतन. नना मनसुनाल अय्ते पेनदा नियमतेन ताकाना इनकुंचंतन, गानि नावा मेंदुलते मनना कराब गुनाल्क नाकुन पापि कबाहक किया वेहचंतां.

8

पेनदा आत्माता ताकतते पिसमळ

1 अदुनहाटीं बोर अय्ते येसुन नम्मिसि ओनतोन कलियतुर, ओर्क पेन सिक्सा हिश्यो. बारित्ते येसुन विस्वासम कीतोर, ओर ओरा बुद्दि मत्ताप आयो गानि आत्मा वेहताप ताकतुर.*

2 बारित्ते पेनदा आत्माता नियम येसु किरिस्तुनाहेंदाल मनाकु पूना पिस्वर हीता. मनाकुन पापम आनि हामुरता नियमताल तपिस्ता.

3 मनकालोरा बुद्दि पापमता कय्दा हिळु मत्ताहेंका मनम मूसाना नियमतुन केंजाकोंटा मत्तोम. अदुनहाटीं अद नियम मनाकुन पिसागोटा पराहिल्ले, अदुन पेने पिसागोटा परता. अद बल्हा इत्ते, पेन दाना मर्रिन इद बूमिते लोहचीता. ओर मनकालोरा पापालकुन तेंडसि पोहनाहाटीं, मनकाना मेंदुलते मारियतोर. अदे मेंदुलते ओर मना पापालकुना सिक्सातुन ओनपोर्रो एतकुत्तोर.

4 अल्हा बारि इत्ते, मूसाना नियमते रासि मत्ता आदेसकु मनाहेंदाल पूरा आयना इंचि. दीनहेंदाल इंदके मनम मना मनसुंक वाताप पिस्सेक हिल्लोम गानि पवित्र आत्मा वेहताप पिस्सेक मंतोम.

5 पापि गुनाल्कुना मनकल, पापि विचाराल्के कीसेक मनंतोर, गानि पेनदा आत्मा वेहताप ताकाना मनकल आत्माकु गावाले मत्ता विचाराल्के कीसेक मनंतोर.

6 इंका बोर मनकल अय्ते पापि गुनाल्कुने पिस्सेक मनंतोरो, ओना हामुर तप्पो. बोर मनकल अय्ते आत्मा वेहताप कींतोरो, ओन्क पिस्वर, सांति दोर्कता.

7 बल्हा इत्ते, पापि गुनमता मनकल पेनदुक पगातोर आंदुर. इसोंटा मनकल पेनदा नियमते ताका हिल्लोर, आनि ताकोरगुडा.

8 पापि गुनाल्कुने पिस्सना मनकल पेनदुन कूस किया पर्रोर.

9 गानि मीवा लोप्पोगिंटा पेनदा आत्मा मत्ते, मिमेट पापि गुनाल्कुने पिस्सेक हिल्लिर गानि आत्मा वेहताप पिस्संतिर. बोना पिस्वरते अय्ते किरिस्तुना आत्मा हिल्ले, ओर किरिस्तुना मनकल आयोर.

* 8:1 इद वचनम कोन्नि पांडु लिपिने हिल्ले.

10 मीवा लोप्पोगिंटा किरिस्तु मनानय्ते, मीवा मेंदुल पापम कीताहाटीं हासि होत्ता, गानि पेन मीकुन सत्तेमतोर कीताहाटीं, मीवा आत्मा बस्केळ्ळक पिस्सि मंता.

11 येसु किरिस्तुन हातोरव्टेटाल मर्रा जीवाते तेहता पेनदा आत्मा ओक्कला मीलोप्पो मनानय्ते, मीवा नासडेम आसि होनना मेंदुलतुनगुडा, मीलोप्पो मनना दाना आत्माहेंदाल जीवाते ईरता.

12 अदुनहाटीं विस्वासुल्कुनिटा, मनम मना पापि गुनाल्कुंक बाकि मत्ताप, अव वेहताप पिस्सना अक्केर हिल्ले.

13 बारित्ते मिमेट पापि गुनाल्कुने पिसानय्ते तप्पाकोंटा हांतिर. गानि आत्माता सहायमतोनि मीवा पापि गुनाल्कुन हव्कानय्ते मिमेट पिस्संतिर.

14 बोर अय्ते पेनदा आत्मा वेहताप ताकंतोर, ओर अंतोर पेनदा मर्क-मियाह्क आंदुर.

15 पेन मीकुन मर्रा दासुल्क कीसि वेराहलय दाना आत्मातुन हिया हिल्ले. गानि अद मीकुन दाना मर्क-मियाह्क इनालय तयार कीता. दानहेंदाल मनम पेनदुन, “बाबाल,” इंचि केया परंतोम.

16 इंका पेनदा आत्मा मना आत्मातोनि कलियसि, मनम पेनदा मर्क-मियाह्कुम इंचि गवाइ हीसेक मंता.

17 मनम पेनदा मर्क-मियाह्क आताहाटीं वारसदार्कगुडा आंदुम. पेनदा वारसदार्क आताहेंका किरिस्तुनतोनिगुडा मनम वारसदार्क. मनम ओनतोनि कलियसि ओना महिमाते पोत्तु आंतोम इनकुनानय्ते, ओना तकलिपतेगुडा पोत्तु आयापीता.

मनाकु पेनदा महिमाता वेलगु दोर्कता

18 नना मीकु इद बारि वेहचंतन इत्ते, मनाकु इंदके तकलिपकु, दुक्काल्क वांतगे, गानि वायाना कालमते पेन दाना महिमाता वेलगुन हीसि बच्चोन मनाकु कदर हिय्यार, दाना मति कीते इंदकेटा तकलिपकु बग्गेन दल्गों इंचि नना इनकुंचंतन.

19 पेन दाना मर्क-मियाह्कुंक हीता कदरतुन बस्के हुप्सार इंचि अद पुट्टिस्तव अन्नितवे वेल्लेन आसेते एदुर ह्ळसेक मंतां.

20 बारित्ते पेन पुट्टिस्तव अन्नितव अवुना इच्चा परकारम बत्तक ओज्जाकोंटा आया हिल्लें, गानि पेने दाना इच्चा परकारम अवुन बत्तक ओज्जाकोंटा कीता.

21 इंचि पेन पुट्टिस्तव अन्निटव नासडेम आयालय मंतां. अदुनहाटीं आ नासडेमताल तपिसि, पेनदा मर्क-मियाहकुनतोनि कलियसि पेनदा महिमा आयाना स्वतंत्रमतुन दोर्किचकुनालय पूरा दुनियंता आसेते एदुर हळसेक मंता.

22 उंदि मुरतळ एरपूराना वेलाते नोपि तेदसि बल्हा तनलाळंता, अल्हेने इद दुनियंता इदवेरादाका तनलाळसेक मंता, इद मनाकु एरपाटे.

23 पेन पुट्टिस्तवे आयाका, पेनदाहेंदाल मोदाटा पलम इंचि आत्मा दोर्कतोरम मनमगुडा, दाना मर्क-मियाहक आयालय मना कराब मेंदुलतुन होळसिसि पूना मेंदुल बस्के दोर्कार इंचि तनलाळसेक मंतोम.

24 मुक्ति दोर्कता इंचि इसोंटा आसेते मनम मना परंतोम. गानि मनम बद आसेते अय्ते मंतोम, अद आसेतुन मनम मना कळकुने हळसेक मननेंके, अद आसे बल्हा आया परंता? बतल अय्ते मनाकु दोर्कता, अदुन एदुर हळसेक बोरन्ना मनांतुरा? मन्नुर.

25 गानि बतल अय्ते मनाकु दोर्काहिल्ले, अदुना आसे पळानय्ते मात्रम मनम वेल्लेने ओप्केते, विस्वासमते एदुर हळसेक मनांतोम.

26 पारतना बल्हा कियमळो तेळियवस्के पवित्र आत्मा मनाकु सहायम कीता. मनाकु इनावायो असोंटा पोल्लेन पवित्र आत्मा मनाहाटीं पेनदागा तनलाळसेक विनंति कीसेक मंता.

27 मना मनसुने मत्ता विचाराल्कुन पेन बेस एरपाट कीता. अल्हेन आत्माता विचाराल्क बतल दानकु बेस एरपाट. अदुनहाटीं पेनदा लोकल्लुक गावाले मत्तदुनहाटीं पवित्र आत्मा विनंति कियनेंके पेनदा विचारम मत्तापे कीता.

28 बोर अय्ते पेनदुन पावरम कीतुर, बोर्कुन अय्ते पेन दाना पिलान मत्ताप केयता, ओर्क बसोंटा परिस्तिति वायिना, पेन आ परिस्तिति ओरा बेसताहाटींगे कीता इत्ता पोल्ले मनाकु एरपाटे.

29 बारित्ते “बोर-बोर नापोरों विस्वासम कीतुर” इंचि पेन मुन्नेटाले एरपाट कीसि मत्ता. दाना मरिं येसु, ओर अंतोरा दादाल आयगोम इंचि पेन ओर्कुन येसुनसंतोर आयानाहाटीं पेरता.

30 बोर-बोर्कुन अय्ते पेन पेरता ओर्कुन दाना हर्दे ताकालय केयता. इंका बोर-बोर्कुन दाना हर्दे ताकालय केयता ओर्कुन नीतिमंतुल्क कीता. इल्हा नीतिमंतुल्क कीतोर्कुंक वेल्लेन कदरगुडा हीता.

31 इव अग्नि पोल्लें केंजतंका मनाकु उंदि विचारम तप्पाकोंटा वांता, अद बतल इत्ते, पेने मना सायतक मत्तस्के मनाकु अड्डम तिरियनाहाटी पगातोर बोर मनांतोर?

32 पेन दानकु मत्ता वरोर मरिनगुडा मनाहाटी हीता. वरोरे मरिं इंचि पज्जो-मुन्ने किया हिल्ले, अच्छोन बेस पेन आंदु, असोंटस्के दाना मरिनतोनि कळमातव अग्निगुडा मनाकु हिय्योना? तप्पाकोंटा हीता.

33 कुद्दु पेने मनाकुन पेरसि नीतिमंतुल्क कीता. अय्ते मनापोर्रो दोसेम दोस्सानोर बोर आंदुर?

34 अय्ते मरि मनाकु सिक्सा तप्पो इंचि बोर इना परांतुर? सिराप पेने इना परंता. गानि येसु किरिस्तु मनाहाटी हातोर अस्के पेने ओन मर्रा जीवाते तेहाचि दाना तिना बाजुंक उपिस्ता. इंदके ओर अगा मनाहाटी पेनतोनि विनंति कीसंतोर.

35 अय्ते मनाकु बदे तिप्पल आयि, लोकुल्कुना विरोद, दुक्कम, कर्वु, कपडिं दोर्काकोंटा आयमळ, दोकाता जेगाते मनमळ आयि, कसेह्क-गोर्काने हक्कनसोंटा वेला वायिनागानि इवन्नि येसु किरिस्तुना पावरमताल मनाकुन लक्कु किया पर्री.

36 बारित्ते, “मोमोट नीवोर्क आताहाटी रोज-रोज लोकुल्क माकुन हक्कालय हळांतुर, मोक्कु हियालय मोळकुता गोरिनलेसी मावा पिस्वर मंता,”☆ इंचि दर्मसास्त्रमते रासि मंता.

37 इवन्नि तकलिप वायिनागानि, मनाकुन पावरम कियना किरिस्तु मनातोनि मत्ताहेंका मनमे गेल्संतोम.

38 बारित्ते नाकु इंदके पुरागा तेळियसोत्ता. अद हामुर आयि, पिस्वरे आयि, पेनदा दूतांगें आयिं, देय्याल्क-बूताल्क आयिं, इद कालम आयि, वायना कालम आयि, बवे सक्तिं आयिं,

39 बूमिता लोप्पोटव आयिं, बूमि पोर्रोटव आयिं. पेन पुट्टिस्तव बवे आयिं मना सामि येसु किरिस्तुनाहेंदाल मनापोर्रो मत्ता पेनदा पावरमताल लक्कु किया पर्री.

9

यहुदिल्कुनपोर्रो पौलुस होंग आंतोर

1-3 नावा यहुदि लोकुल्क पेनदाल बल्हा लक्कु आसि मंतुर मरि? ओर अल्हा आताहाटी मनसुने नाकु वेल्लेन दुक्कम, बादा अनपिच्चंता. नना किरिस्तुना

मनकन इंचि इदु पोल्ले निजम वेहचंतन, आबद्दम आयो. नावा लोप्पो मनना पवित्र आत्मागुडा इद निजम इंचि गवाइ हीसंता. पेन नाकु सापनेम हीसि, नाकुन किरिस्तुनाल लक्कु कियिना बेसे! नावा मनसु मात्रम नावा इस्राएल लोकलक पिसगोम इंचि मंता.

4 पेनदा मर्क-मियाहक आयाना हक्क इस्राएलना वंसंमते पुटतोरदे* आंद. पजा बय्लि बूमि ते मत्तस्के पेनदा महिमा पेद्दा वेल्गासि इस्राएलना वंसंमतोर्के दिसता. करार्क ओरतोने कीता, मूसाना नियम्कुगुडा ओर्के हीता, मोळकाना बेस रिवाजकु हीता, अचोने आयका ओर्क पोल्लेगुडा हीता.

5 एनकटा पेद्दालक अब्राहाम, इसाक आनि याकोब ईरगुडा ईरोरे आंदुर. अचोने आयका येसु किरिस्तुगुडा मनकन रूपमते ईरा वंसंमतेन पुटतोर. अन्निन ताकसना अदिकारम मत्ता पेने ई येसु किरिस्तु आंदुर. अव अन्नि बस्केळ्ळक ओने तल्सकुन्नि. आमीन.

6 पेन इस्राएलना वंसंमतोर्के हीता पोल्ले तपता इंचि नना इंचेक हिल्लेन, गानि इस्राएल देसेमते पुटतोर अंतोर इस्राएलना वंसंमतोर आयुर इंचि नना वेहचंतन.

7 अचोने आयका अब्राहामुना वंसंमतोर अंतोरगुडा ओना निजम पिलालक इंचि मनम इनानायो. बारित्ते इदुना बारेमते दर्मसास्त्रमते, “सिराप इसाकुना वंसंमतोरे नीवा वंसंमतोर इंचि लेक्का कियमळ जर्गता,”* इल्हा रासि मंता.

8 दीना अर्तम बतल इत्ते अब्राहामुना वंसंमते पुटतोर अंतोर पेनदा मर्क-मियाहक आया पस्स. गानि पेन हीता पोल्ले परकारम बोर अय्ते पुटतुर ओरे अब्राहामुना निजम मर्क-मियाहकुना लेक्काते वांतुर.

9 अब्राहामुंक पेन हीता पोल्ले इल्हा मत्ता, “इत्ता वेलाक नना मर्मा मल्लिस वांतन, साराल† वरोर मर्रिन कनंता.”*

10 आ मर्रि इत्ते मना एनकटा पेद्दा मनकल इसाक आंदुर. ओर रेबेका इनानदानतोनि मरमि आतोर अस्के अद नेला तप्सि एमडाल्कुन कंता.

11-12 गानि आ पिलालक पुट्टका मुन्नेन, ओर बद्दे मंचि-सेड्डा किय्यका मुन्नेन पेन रेबेकांकु, “मुन्ने पुट्टना पेडल पज्जो पुट्टनोना सेवा कियानुर,”* इंचि वेहचि मत्ता. पेन मनकालोर्कुन ओर कीता कबाहकुन पोर्रोटाल केयो, गानि दाना इच्चा मत्ताप ओर्कुन केयंता, इंचि मनाकु दीनहेंदाल तेळियता.

* 9:4 वंसंमते पुटतोरदे यहूदि लोकलक. ☆ 9:7 उत्पत्ति 21:12 † 9:9 साराल इद अब्राहामुना मुत्तो आंदु. इद गोडमुरादि मत्ता. ☆ 9:9 उत्पत्ति 18:10-14 ☆ 9:11-12 उत्पत्ति 25:23

13 दीना बारेमते दर्मसास्त्रमते, “नना याकोबुन कीतच्चोन पावरम, एसाबुन किया हिल्लेन,”☆ इंचि रासि मंता.

14 इदुन कैजसि मनम बतल इंदकोम मरि? पेन अन्यायम कीता इंदकोमा? असले आयो.

15 बारिल्ले, “नना बोनपोर्रो दया हुपिच्चन, बोनपोर्रो दया कीकन, बोनपोर्रो दया हुपिच्चन, बोनपोर्रो दया कीकन, अद नावा इस्टम मत्ताप नना कीतन,”☆ इंचि पेन मूसांक वेहचि मत्ता.

16 इल्हा बोनपोर्रो दया किय्यना इंचि पेने निरनायम कीता. इद मनकना कय्दे हिल्ले. दान दोर्किच्चुकुननाहाटी मनम बच्चोन कस्टम किय्येना एर्तमे.

17 पेन पिरोन‡ राजानतोनि इत्ता पोल्ले दर्मसास्त्रमते इल्हा रासि मंता: “नावा ताकततुन नीवाहेंदाल हुप्संतन अस्के नावा पोरोल पूरा दुनियामेळ तेळियसि होन्नार. इदुनहाटीगे नना नीकुन राजाल इंचि निलाहतन.”☆

18 दीनहेंदाल मनाकु बतल तेळियंता इत्ते, पेन अद इनकुत्तोन पोरो दया कीता, अल्हेने अद इनकुत्तोन कटकेलमरि कीता.

19 इसोर्टस्के, “पेन अय्ते अद इनकुत्तापे ई दुनियाते किया गोदूंतता. अयना मावा पोर्रेन बारि दोसेम दोसंता?” इंचि मिमेट नाकुन इनकिर.

20 गानि मनका, पेनदुन मल्सि पूसकियानोन निमे बोन आदिन? “निमे नाकुन इल्हा बारि तयार कीतिन?” इंचि अळका बस्केनना कुम्पन पूस कीतना?

21 उंदे तोळि मुद्दाताल सगोम बेस सिंगारम अळकां, इंका सगोमताल सादा अळकां तयार कियना अदिकारम वरोर कुम्मांकु हिल्लेना? तप्पाकोटा मंता.

22 अल्हेने पेनदुकगुडा अद इनकुत्ताप कियना अदिकारम मंता. गानि नासडेम आसि होनानोर्कुन नासडेम कीसि पोहका ओप्के पीसि मत्ता.

23 पेन अल्हा ओप्के पीसि बारि मत्ता इत्ते, पेन दाना महिमा आनि दया बच्चोन बेसतद इंचि बोर लोकुल्कुंक अय्ते हुप्सना मत्ता, अद ओर्कुन मुन्नेन पेरता.

24 मनम अंटोरम पेन पेरता लोकुल्के. गानि पेन सिराप मना यहुदिल्कुनाले पेरा हिल्ले, यहुदि आयवोर लोप्पोटालगुडा पेरता.

25 यहुदि आयवोरा बारेमते पेन होसे पोरोलता पेनदा कबुरतोना पुस्तकमते इल्हा वेहता:

☆ 9:13 मलाकी 1:2-3 ☆ 9:15 निर्गमन 33:19 ‡ 9:17 पिरोन पिरोन राजाल इरगा कटकेलमरि मत्तोर, इंचि पेन ओन इंका कटकेलमरि कीता. कटकेलमरि मत्तोने पेन कटकेलमरि कीता अंटोर्कुन आयो. ☆ 9:17 निर्गमन 9:16

“मुन्ने नना बोर लोकल्कुन अय्ते नावा लोकल्क इंचि इना हिल्लेन,
इंदके ओर्कुन नना नावा लोकल्क इंचि केयकन.

इंका दीनकन्ना मुन्ने बोर्कुन अय्ते नना पावरम किया हिल्लेन,
ओर्कुन नना पावरम कीकन.”

इल्हा पेनबाबाल रासा वेहतोर. अचोने आयका,

26 “मिमेट नावा लोकल्क आयिर इंचि नना बगा अय्ते इत्तनो,
अग्गेन मिमेट जीवाते मनना पेनदा मर्क-मियाह्क आतिट इंचि इनानुर,”✠
इल्हा रासि मंता.

27 इंका यसायाह इनना पेनदा कबुरतोरगुडा इस्राएल लोकल्कुना बारेमते बतल
इत्तोर इत्ते,

“इस्राएल लोकल्क समुद्रमते मनना उस्केलेसीं लेक्का परवच्चुर मंतुर.
अयना पेन हियना सिक्सताल इच्चुरे पिस्संतुर.

28 बारित्ते ई दुनियाते मनना
अंतोर लोकल्कुन पेन बिरानेन सिक्सा कियानद मंता, अद पुरागा कीता,”✠
इंचि वेहतोर.

29 अचोने आयका,

“अन्निटकन्ना ताकतवार पेन ओक्कला मनाहाटी,
मना वंसमतोरवेटाल इच्चुर्कुन होळसाकोंटा मंचि मत्ते,
मनम सदोम, गमोरा नहकुना लोकल्कुनालेसीं नासडेम आसि मन्नेरम,”✠
इल्हागुडा यसायाहल मुन्नेन वेहचि मत्तोर.

बेसता कबुर आनि यहुदिल्क

30 अय्ते मनम इंदके बतल इनकोम? यहुदि आयवोर पेनदा मुन्ने नीतिमंतुल्क
आयालय ह्ळ्हा हिल्लुर गानि येसु ओराहाटीं कीतदुन ओर विस्वासम कीतुर इंचि
पेन ओर्कुन नीतिमंतुल्क कीता.

31 इस्राएल लोकल्क बारे मूसाना नियमते वेहताप ताकसि नीतिमंतुल्क आंतोम
इंचि इनकुत्तुर. गानि ओर अल्हा नीतिमंतुल्क आया हिल्लुर.

32 बारित्ते ओर किरिस्तुन विस्वासम किय्यका बेसता कबाहक कीसि नीतिमंतुल्क आयालय हळतुर. इंचि येसु किरिस्तु इस्राएल लोकलुकुनाहाटी ओरा हरदे, दल्लिसि हिळु अरहना बंडालेसी[§] मंतोर.

33 इदुना बारेमते दर्मसास्त्रमतेगुडा इल्हा रासि मंता:

“हृळाट, सियोनते* नना उंदि बंडातुन इरसंतन,

अद बंडा इच्चुर्क दल्लिंगा, इकिच्चुर बारे दान्क दल्लिसि हिळु अरंतुर.

बोर अय्ते दानपोर्रो विस्वासम इरंतुरो, ओरद बस्केने सिन्नातनम आयो.”[☆]

इंचि रासि मंता.

10

1 विस्वासलुकुनिटा! नावा इस्राएल लोकलुकुंक पेन मुक्ति हिथ्यि इंचि नावा वेल्लेन मनसु मंता. अदुनहाटी नना पेनदुक पारतना कीसेकेन मंचंतन.

2 पेनदा सेवा कियना इंचि ओर्क वेल्लेन जिद्दु मंता, इदुन नना कुद्दु हळतन. गानि पेनदा सेवा कियना निजम हरि ओर्क तेळियो.

3 बारित्ते पेने लोकलुकुन नीतिमंतुल्क कीता इत्ता संगति ओर्क तेळियका, सतता नियमताहेंदाल नीतिमंतुल्क आंतोम इंचि ओर इनकुत्तुर. इल्हा ओर पेन हृपिस्ता हर्दुन ओप्कुना हिल्लुर.

4 गानि येसुनपोर्रो विस्वासम कियानोर अंतोर नीतिमंतुल्क आयानाहाटी किरिस्तु मूसाना नियमता आकिरि आंदुर.

पेन अंतोर्कुन पिसागोटंता

5 दर्मसास्त्रमते मूसाल बतल रासतोर इत्ते, “बोर अय्ते दर्मसास्त्रमते मत्ताप ताकसि नीतिमंतुड आयालय हळतुर, ओर उंदि नियमगुडा तप्पाकोटा ताका पीता, अस्केन ओर अवुनहेंदाल नीतिमंतुड आंतोर.”[☆]

6-8 मिमेट, “माकु पेनदा पोल्लें कराहलासि स्वर्गमते होंचि किरिस्तुन इदु बूमिपोर्रो बोर तरा परांतोर, हिलाकोटे हातोरवेटाल किरिस्तुन जीवाते तेहचि तरालय बोर दांतोर?” इंचि इनकुनमट. गानि विस्वासम कीसि नीतिमंतुड आयनोरा बारेमते दर्मसास्त्रम बतल वेहंता इत्ते, “पेनदा पोल्लें निहागेन मंता, नीवा मनसुना लोप्पो आनि नीवा तोळदेन मंता.” मोमोट मीकु वेहता पोल्लें इवे आंदुं.

§ 9:32 हिळु अरहना बंडाइद वचनमते हिळु अरहना बंडाता अर्तम येसु सामि आंदुर. * 9:33 सियोन इद येस्सलेम सहरता पडना पोरोल आंद. ☆ 9:33 यसायाह 8:14; 28:16 ☆ 10:5 लैव्यवस्ता 18:5

9 अद बल्हा इत्ते, नीवा पिस्वरते, येसुए नावा सामि इंचि निमे तोळ्दाल ओक्कुंचि, ‘ओन पेन हातोरवेटाल मर्रा जीवाते तेहता,’ इंचि निमे नीवा मनसुनाल विस्वासम कीते, पेन नीकु मुक्ति हीता.

10 बारित्ते मनम मनसुनाल विस्वासम कीतोम इंचि मनाकुन पेन नीतिमंतुल्क कीता. तोळ्दाल ओक्कुत्तोम इंचि मनाकु पेन मुक्ति हीता.

11 दर्मसास्त्रमतेगुडा इल्हा रासि मंता: “ओनपोर्रो विस्वासम कियानोर बोरै आयिर, पेनदा मुन्ने ओनद बस्केने सिन्नातनम आयो.”☆

12 पेनदापोर्रो विस्वासम ईनोर बोरै आयिर, ओर यहूदि आयिर, युनानिर आयिर अंटोर उंदे, अंटोर्कुंक ओर वरोरे सामि आंदुर. ओना पोरोल एतसि पारतना कियना अंटोर्कुंक ओर वेल्लेन आसिर्वाद् हीतोर.

13 “सामिना पोरोल एतसि पारतना कियनोर ओर बोरन्ना आयिर पेन ओन पिसागोटंता,”☆ इंचि दर्मसास्त्रमते रासतद मंता.

14 बोर अय्ते किरिस्तुनपोर्रो विस्वासम किया हिल्लुर, ओर ओना पोरोल बारि एतनुर? बोर अय्ते ओना बारेमते केंजा हिल्लुर ओर बल्हा विस्वासम कियानुर? बोर अय्ते ओर्क वेहानोर हिल्लुर, ओर बल्हा केंजानुर.

15 अल्हेने पेन बोर्कुने लोहाकोटे ओरगा होंचि ओर बल्हा वेहा परांतोर? असले वेहा परोर. दीना बारेमते दर्मसास्त्रमते इल्हा रासतद मंता: “बेसता कबुरतुन पीसि वायना लोकुल्कुन हळते बच्चोनो कुसि आंता!”☆ इंचि रासि मंता.

16 गानि इस्राएल लोकुल्क अद बेसता कबुरतुन केंजसिगुडा अंटोर विस्वासम किया हिल्लुर. बारित्ते, “ए सामि! मोमोट वेहता कबुरतुन बोर नम्मुतुर?”☆ इंचि दीना बारेमते दर्मसास्त्रमते यसायाहल रासतोर.

17 इल्हा किरिस्तुना बारेमता बेसता कबुरतुन बोरन्ना वेहतेने केंजांतुर, केंजतेने विस्वासम किया परांतुर.

18 अयना नना उंदि पोल्ले पूसकीतन, इस्राएलतोर इद कबुरतुन केंजा हिल्लुरा? तप्पाकोटा केंजतुर. इदुना बारेमते इल्हा रासतद मंता:

“ओरा लेंग दुनियंता केंजा होत्ता, ओरा पोल्ले दुनियाता मूला-मूलादाका एव्ता,”☆ इंचि दर्मसास्त्रमते रासि मंता.

☆ 10:11 यसायाह 28:16 ☆ 10:13 योएल 2:32 ☆ 10:15 यसायाह 52:7

☆ 10:16 यसायाह 53:1; योहान 12:38 ☆ 10:18 बजन संहिता 19:4

19 अयना इंकुंदि पोल्ले पूसकीतन, इस्राएल लोकल्क कबुर केंजतस्के अद ओर्क तेळियतना तेळिया हिल्लेना? तप्पाकोंटा तेळियता. मूसाना नियमते मुन्नेन रासि मत्ताप,

“विलवा हिलुवा यहुदि आयवोर्कुन नना पावरम कीसि,

मीकु कळक पोतानाल कीतन.

अल्हा कीसि नाकुन एरपाट कियवा यहुदि आयवोरहेंदाल,

मीकु होंगु वायनाल कीतन,”☆

इंचि पेन इस्राएल लोकल्कुन इत्ता.

20 पजा

“नाकुन पहकवोर नाकुन दोर्किच्छुल्लुर.

नाकुन पूसकियवोर्कुन ननाने कुद्दु दिसतन,”☆

इल्हा पेन वेहता पोल्लेतुन दैरनेम कीसि यसायाहलगुडा रासतोर.

21 गानि इस्राएल लोकल्कुना बारेमते पेन बतल इत्ता इत्ते,

“ना पोल्ले केंजाकोंटा मर्लाबळता लोकल्कुनाहार्टी,

नना दिन्म एदुर हळसेक मत्तन,”☆

इंचि पेन वेहता पोल्लेतुन यसायाहल रासतोर.

11

पेन दाना लोकल्कुन होळसो

1 अयते मरि, पेन दाना इस्राएल लोकल्कुन होळसीता इत्तापा? हिल्ले. बारित्ते ननागुडा इस्राएल मनकने आंदुन. नना अब्राहामुना वंसंम आनि बेंजामिन* गोत्रमतोन आंदुन.

2-3 पेनदुक मोदोलताले तेळियसि मत्ता. दाना इस्राएल लोकल्कुन अद होळसा हिल्ले. एलिया इनना पेनदा कबुरतोना बारेमते दर्मसास्त्रमते बतल रासि मंता मीकु तेळियोना? ओर इस्राएल लोकल्कुनपोर्ो तप्पुक दोस्सेके इल्हा इत्तोर, “ए सामि, ई लोकल्क अयते नीवा कबुरतोर्कुन हव्कतुर, नीकु मोक्कु हिय्यना गद्देनंता कूलाहतुर. नना वरोने पिस्सि मंतन. इंदके नाकुनगुडा हव्कालय हळसंतुर,”☆ इंचि इत्तोर.

☆ 10:19 व्यवस्ताविवरन 32:21 ☆ 10:20 यसायाह 65:1 ☆ 10:21 यसायाह

65:2 * 11:1 बेंजामिन इस्राएलतोर पन्नेड गोत्राल्कुनाल उंदि गोत्रम आंद. ☆ 11:2-3 1 राजा 19:10-14

4 गानि पेन ओन्क बसोंटा जवाब हीता मीकु मति मंतना? “अल्हा इनकुनमा! बाला इनना पेनदुक बस्केने मोळकवसोंटा एडुं वेय्कुना मंदितुन नावाहाटीं नना वेंरे कीसि इरतन,” ☆ इंचि पेन ओन्क वेहता.

5 अल्हेने इंदकेगुडा पेनदा कुर्पाहेंदाल इच्चुर लोकुल्कुन दानाहाटीं वेंरे कीसि इरता.

6 ओरा बेसता कबाह्कुन हळसि पेन ओर्कुन पेरां हिल्ले, गानि अद दाना कुर्पाहेंदाले ओर्कुन पेरता. ओक्कला अल्हा जर्गकोंटा मंचि मत्ते, दाना कुर्पा निजम कुर्पा मनाकोनवड.

7 इल्हा इस्राएल लोकुल्क बदुन अय्ते मनसु तासि प्हकसेक मत्तुरो, अद ओर्क दोर्काहिल्ले. गानि पेन पेरकुत्तोर्कुंक मात्रम अद दोर्कता. कळमतोर बोर अय्ते मत्तुर, ओर पेनदा पोल्ले केंजाकोंटा ओरा मनसुन गळसु कीता.

8 दर्मसास्त्रमतेगुडा इल्हेन रासि मंता:

“पेन ओर्कुन निद्रा मत्ताते वाटसीता, ☆ कळक मंचिगुडा हिलवाप कीता.

केळक मंचिगुडा हिलवाप कीता, इदवेरदाकागुडा ओरा गति इल्हे मंता.” ☆

9 इदुना बारेमते दाविद राजालगुडा दर्मसास्त्रमते इल्हा इत्तोर,

“ओर तिनुळ-उनुळ कियना वेलाते, उंदि गत्तरा वाताप ओर्क तकलिप वायि.

तकलिप वासि ओर हिल्लु अर्रि, ओरा पापाल्कुना सिक्सा ओरे बोगांचिर.

10 ओरा कळकुंक हीकट वाताप आसि, निजम बतलो ओर्क दिसाकोंटा आयि.

ओरा नडिं कस्टाल्कुना मोता कांजा पराका, बस्केळताहाटीं गूनि आसि होन्नि,” ☆

इंचि इत्तोर.

11 अय्ते नना इंकुंदि पोल्ले पूसकींतन. इस्राएल लोकुल्क पुरागा तेदा पराकोंटा हिल्लु अरतुरा? अर्रां हिल्लुर. गानि ओर पापम कीतुर इंचि ओर्क दोर्कना मुक्ति, यहुदि आयवोर्क दोर्कता. दीन हळसि यहुदि लोकुल्कुना कळक पोत्तागोम इंचि पेन अल्हा कीता.

12 यहुदि लोकुल्क किरिस्तुन हय्सका पापम कीतुर अय्ते दुनियाते मनना वेंरे जातितोर्क पेन वेल्लेन आसिर्वाद हीता. यहुदि लोकुल्कुंक नुकसान आताहेंका यहुदि आयवोर्क पायदा आता. इल्हा यहुदि लोकुल्कुंक नुकसान आताहेंकेन अंतोर्क पायदा आता अय्ते, मिमेटे विचारम कीम्टु, ओक्कला ओरगिंटा

☆ 11:4 1 राजा 19:18 ☆ 11:8 यसायाह 29:10 ☆ 11:8 व्यस्ताविवरन 29:4

☆ 11:10 बजन सहिता 69:22-23

किरिस्तुनहेके पुरागा तिरियानय्ते दुनियाते मनना वेरे जातितोर्क बच्चोन वेल्ले आसिर्वाद दोर्कार!

यहुदिल्क विस्वासमते वांतुर इत्ता पौलुस आसे

13 इंदके यहुदि आयवोरव्टेटाल मिमेट बोर अय्ते विस्वासमते वातिर, मीक वेहानद बतल इत्ते, पेन नाकुन प्रेरित इंचि मीवाहाटी पेरता. अदुनहाटी नना कियना सेवा बच्चोनो बेसतद इंचि वेल्लेन कूस मंतन.

14 इल्हा कीतेनना मीकु आता पायदातुन हूळसि नावा यहुदि लोकुल्कुना कळ्ळ पोत्सि ओराव्टेटाल गिच्चचुरन्ना विस्वासमते वायानुर इंचि नावा आसे.

15 अद बल्हा इत्ते, इस्राएल लोकुल्क पेनदाल लक्कु आताहेंका दुनियातोर पेनदुक दग्गेरा आतुर. इस्राएल लोकुल्कगुडा पेनदुक दग्गेरा आंतुर इनकुट, अस्के इद पोल्ले वरोर हातोंक मर्जा जीवा अरतापे आयोना!

16 ओक्कला अब्राहाम आनि एनकटा पेद्दाल्क पवित्रमातोर आते, ओरा पिलाल्कगुडा पवित्रमातोंरे आंदुर. ओक्कला मराता हिह्कुगिंटा पवित्रमातव आते, मराता कोम्मांगुडा पवित्रमातवे आंदुं.

17 यहुदिल्क इत्ते पेन पोस कीता जय्तुन मराता कोम्मनसंटोर आंदुर. मिमेट यहुदि आयवोर इत्ते केडाते पुटसि-बेर्सता जय्तुन मराता कोम्मनसंटोर आंदिर. पेन पोस कीता मराताल सगोम कोम्मन रेब्बिस पोहताप पेन दान नम्मुवा यहुदिल्कुन पोहचीता. पोहचि, केडाते पुट्सि-बेर्सता जय्तुन मराता कोम्मन तच्चि रेब्बिस पोहता कोम्मना जेगाते अंटा वाटताप मीकुन ओरव्टे कल्पता. अल्हासि पेन पोस कीता मराता हिह्कुनाल मीकु ताकत दोर्कसंता.

18 बस्केळ्ळ आयि, हिह्कुनाले कोम्मांक ताकत दोर्कता, कोम्मानाल हिह्कुंक आयो इदुन मति ईरट. अदुनहाटी “रेब्बिस पोहता कोम्मांकन्ना मोमोटे बेसतोरम” इंचि पोंगमट.

19 इद केंजसि, “माकुन अंटा वाटालये कोम्मन रेब्बिस पोहता,” इंचि मिमेट इंदके इनकुंचतिर बारे!

20 मिमेट इनानद निजमे! गानि उंदि पोल्ले मति ईरट, ओर पेन पोरो विस्वासम कियवाहेंका पेन ओर्कुन कोम्मन नर्किसि पोहताप पोहचीता. मिमेट बारे किरिस्तुनपोरो विस्वासम कीतिर इंचि पेनतोनि कलियसि मतिट. अदुनहाटी वट्टिदे पोंगसेके तिरियाकोंटा पेनदुक वेरियसि मंटु.

21 बारित्ते पेन सतागा पोस कीता मराता कोम्मनसोंटा यहुदिल्कुने रेब्बिस पोहता अय्ते, मिमेट अय्ते केडाते पुटसि-बेर्सता मराता कोम्मनसंटोर, विस्वासमते कमजोर आते मीकुन असले होळसो.

22 नना वेहानद बेस केंजट. मिमेट पेनदा दयातुन, दाना होंगुन बेस एरपाट कीम्टु. बोर अय्ते विस्वासमताल पजोळ्क आतुर, ओरापोरों पेन होंग हुपिस्ता. गानि मिमेट विस्वासमते ताकसेकेन मंतिर इंचि मीवापोरों पेनदा दया मंता. हिलाकोंटे मीकुनगुडा कोम्मन नर्किसि पोहताप तेंडसि पोहंता.

23 नर्किसि पोहता कोम्मनसोंटा यहुदि लोकुल्क ओक्कला मर्रा पेनदापोरों विस्वासम कीते, नर्किस पोहता कोम्मन मर्रा अंटा वाटताप पेन ओर्कुन मर्रा दानतोनि कल्पकुंता. बारित्ते पेन अल्हा किया परंता.

24 मिमेट अय्ते केडाते पुटसि-बेर्सता जय्तुन मराता कोम्मनसंटोर आंदिर. यहुदिल्क बारे पेन पोस कीता जय्तुन मराता कोम्मनसंटोर आंदुर. अयना मीकुन पेन दाना लोकुल्कुने कल्पकुत्ता अय्ते, यहुदिल्क पेनदागा मर्रा मल्सि वायानय्ते अद ओर्कुन मर्रा अल्कगा कल्पकुना परंता.

पेन इस्राएल लोकुल्कुन पिसागोटंता

25 विस्वासुल्कुनिटा, “मोमोटे तेल्विगल्लोरम” इंचि मिमेट पोंगामन्नि. अदुनहाटी इस्राएलतोरा बारेमता उंदि मर्मम मीकु वेहना इनकुत्तन. अद बतल इत्ते, पेनदा विचारम परकारम, यहुदि आयवोर बचटुर लोकुल्क अय्ते विस्वासमते वायनद मंता ओर अंटोर किरिस्तुनपोरों विस्वासम कियनदाका इस्राएलता इच्चुर लोकुल्क पेनदा पोल्ले केंजाकोंटा गळसु आसि मनानुर.

26 गानि दाना पजा अंटोर इस्राएल लोकुल्कुन पेन पिसागोट्टार. इदुना बारेमते इल्हा रासि मंता:

“पिसागोटनोर सियोनताल वायानुर,

ओर याकोब वंसमतोर्कुन तप्पुड हरदाल तिराहचि बेसता हर्दुक तरांतोर,

27 नना ओरा पापाल्कुन मापि कीसि, ओरतोनि कीता करारतुन पूरा कीतन,”✠

इंचि पेन इत्ता पोल्ले दर्मसास्त्रमते रासि मंता.

28 वेल्लेटोर इस्राएल लोकुल्क किरिस्तुना बारेमता बेसता कबुरतुन नम्मुवाहेंका इंदके ओर्कुन पेन बेसता कबुरता पगातोर इंता. दीनहेंदाल मीकु मात्रम पायदा आता.

गानि अब्राहाम, इसाक, याकोब ई एनकटा पेद्दाल्कुंक हीता पोल्ले परकारम यहुदिल्क इंदकेगुडा पेनदा पावरमगल्ला लोक्कुल्ले आंदुर.†

29 बारित्ते वरम हियमळता बारेमते आयि, दग्गेर्क केयकुनना बारेमते आयि, पेन बस्केने पजोळ्क आयो.

30 यहुदि आयवोर मिमेट, मुन्ने पेनदा पोल्ले केंजाकॉदिर. गानि इंदके यहुदिल्क पेनदा पोल्लेतुन केंजवाहेंका पेन मीकुन दग्गेरा कीसि मीवापोर्रो दया कीता.

31 अल्हेने इंदके यहुदिल्क पेनदा पोल्ले केंजसेक हिल्लुर. अदुनहाटी पेन मीवापोर्रो दया कीता. इदे कुर्पाहेंदाल उंदि रोजु ओरपोर्रो गुडा पेन दया कीता.

32 बारित्ते, पेनदुक अंतोर लोक्कुल्लुकुनपोर्रो दया कियानद मंता. अदुनहाटी पेन यहुदिल्कुन, यहुदि आयवोर्कुन अंतोर्कुन दाना पोल्ले केंजाकॉटा, गळसु कीसि इरता.

33 ओहो, मावा पेनदा दनम, बुद्दि आनि तेल्वि बच्चोन पेद्देद आंद! अद बल्हा न्यायम कीता, बस्के कीता, इदुन बोरे एरपाट किया पर्रोर. दाना हरि बोर्के तेळियो.

34 दर्मसास्त्रमते इल्हा रासि मंता:

“पेनदा विचाराल्कुन बोर एरपाट किया परंतोर? पेनदुक बोरन्ना बुद्दि वेहा परंतोरा?✧

35 हिलाकॉटे बोरन्ना पेनदुक बाकिक हीतोर मंतोरा, दान मर्ग तिरियसि तल्कालय?✧ हिल्ले.”

36 दुनियाते मनानव अन्नि पेनदागटाले वातां, अन्नि अदे पुटिस्ता, दुनियाते मनानव अन्नि दानाहाटीगे मंतां. युगा-युगाल्कुनदाका दानदे महिमा आयि, आमीन.

12

मीवा पिस्वरतुन पेनदुक अप्पजेप्पट

1 अय्ते विस्वासल्कुनिता! पेन मनापोर्रो कीता दयातुन मति कीसि, नना मीकुन बतिमलाडसि विनंति कियानद बतल इत्ते, मिमेट मीवा पिस्वरतुन पवित्र इरसि, पेनदुक नच्चनसोंटा मोक्कु हीताप मी पिस्वरतुन जीवाते मननेकेन अप्पजेप्पट. इल्हा कीतेन मिमेट पेनदा निजम सेवा कीसि तलस्कुत्ताप आंता.

† 11:28 पेन पेद्दाल्कुंक हीता पोल्ले उत्पत्ति 12:2-3 वचनाल्कुने रासि मंता. ✧ 11:34 यसायाह 40:13 ✧ 11:35 अय्यूब 41:11

2 मिमेट इद दुनियातोर पिसताप पिस्सामन्नि गानि मिमेट मीवा मनसु मार्सकुंचि पेनदुक नच्चना पिस्वर पिस्सट. अस्के पेनदा इच्चा बतलो एरपाट कीतिर. एरपाट कीसि, “अद इच्चा वेल्लेन बेसतद, कुसि हियानद, बतले तप्पु हिलवद,” इंचि मीकु तेळियंता.

3 पेन दाना कुर्पाते नाकुन सेवक इंचि निलाहता, दानहाटीं नना मीकु वरोर-वरोक बतल वेहसेक इत्ते, पेन मीक तूसि हीता विस्वासमता लेक्का परकारमे वळ्ळकना अचोने, दानकन्ना एक्को विचारम कियमट.

4 मना मेंदुल उंदे गानि दान्क कय्क, काल्क, कळ्ळक, केळ्ळ, तोड्डि, मोसोर तल्ला इवन्नि मंतां. इवन्नि उंदे कबळ किय्यका, वेरे-वेरे कबाहक कीतां.

5 अल्हेन मनमगुडा वेल्लेन मंदि अय्नागानि किरिस्तुनतोनि कलियसि उंदे मेंदुललेहका मंतोम. इंचि मनम कय्क-काल्कुनलेहका उंदे मेंदुलक अंटिस मंचि वरोक-वरोर बेस कलियसि मंतोम.

6 पेन मनापोरों कुर्पा हुप्पिचि मनाकु वरोर-वरोक उंद-उंदि वरम हीता. आ वरमतुन एरपाट कीसि मनम पेनदा सेवा किय्युळ गावाले. ओक्कला बोनकन्ना पेनदाहेंदाल कबुर तच्चि वेहना वरम दोर्कते, ओर ओना विस्वासमता लेक्कातेन अद कबळ कियगोम.

7 सेवा कियना वरम दोर्कतोर ओर विस्वासमते सेवा कियगोम, पेनदा पोल्ले करहना वरम दोर्कतोर ओर विस्वासमते पेनदा पोल्ले करहना कबळ कियगोम.

8 कराहचि दैरनेम हियना वरम दोर्कतोर कराहचेके दैरनेम हीसेक होनना, दानम किया परानोर ओर पूरा मनसुनाल दानम कियगोम, लीडर आसि लोकुल्लुकुन ताकसना वरम दोर्कतोर जिम्मेदारिते ओर्कुन ताकिचगोम आनि दया कियना वरम दोर्कतोर ओर कुसिते दया कियगोम.

9 लोकुल्लुकुं हप्सना इंचि पावरम कियमट, निजम पावरम कीम्ट. तप्पु कबाहकुन हय्समट, बस्केळ्ळक बेस कबाहक कीसेक मंटु.

10 उंदि कुटुंबतोरलेसीं वरोक-वरोर बेस पावरम कीकुंटु, वरोक-वरोर कदर हियनेके, मनाकन्ना एक्को इंकावरोक कदर हीम्टु.

11 कबळते बस्केने लंडु कियमट, पेनदा सेवा कियनाहाटीं मीवा जीवा बस्केळ्ळक उसार ईरंट.

12 पेन हीता आसेते मिमेट बस्केळ्ळक कूस मंटु. तिप्पल्क वायिनागानि पजोळ्ळक होनाकोटा ओर्सकुंटु. बस्केळ्ळक पारतना कीसेके मंटु.

13 पेनदा लोकल्लुक अक्सरम अरतस्के मिहगा मत्तद ओर्क हीसि सहायम कीम्टु, बोरन्ना विस्वासुल्क मी लोन वातस्के ओरा सेवा कियालय बस्केळक तयार मंटु.

14 मीकु तकलिप हियानोर्कुंक आसिर्वाद हीम्टु. आसिर्वाद हीम्टु गानि सापनेम हियमट.

15 कुसिते मननोरतोनि मिमेटगुडा कुसिते मंटु, अळानोरतोनि मिमेटगुडा अळट.

16 अंटोरतोनि बेस कलियसि मंटु, पोमाडेगि वेहकुन्मटु. कदर हिल्ला लोकल्लुकनतोनि बेस कूळसि मंटु, मोमोटे तेल्विगल्लोरम इनकुनमटु.

17 बोरन्ना मीकु तकलिप हीते, मिमेट ओर्क तकलिप हीसि बदला येतमट. अंटोरा नदरते बद बेसो, अदे कियना विचारमते बस्केळक मंटु.

18 कुदुरतच्चोन अंटोरतोनि बेस कलियसि सांतिते मनना कोसिस कीम्टु.

19 “बदला येतना कबळ नावद आंद, मिमेट बदला येतमट,” ☆ इंचि पेन वेहता पोल्ले पुस्तकमते रासि मंता. अदुनहाटी नावा पावरमगल्ला विस्वासुल्कुनिटा, मिमेट बदला येतमट, ओरा बदला पेन येतंता, ओर्कुन पेनदुक होळसीम्टु.

20 अल्हा पगा येतनदानकन्ना

“मीवा पगातोर कर्वुने मत्तस्के ओर्क गाटो दोस्सट,

दूपाते मत्तस्के एर हीम्ट.

अल्हा कीते, अय्यो! मोमोट बच्चोन पेद्दा तप्पु कीतोम,

इनकुंचि ओरद-ओर्के सिग्गु वांता.” ☆

21 मीवा कय्दाल सेड्डा कबाहक आयाकौटा उसारते मंटु, बेसता कबाहक कीसि सेड्डा कबाहकुन ओळिच्चट.

13

अदिकारिना कय्दा हिल्ल मंदना

1 इदु दुनियापोर्रो मननव अन्नि अदिकाराल्क पेनदाहेंदाले वातव आंदु, इंदके राज्येम कियनोर्कगुडा पेने अदिकारम हीता. अदुनहाटी राज्येम कियनोर वेहाताप अंटोर बेस केंजिस ताका पीता.

2 बारित्ते, अदिकारि वेहाताप ताकवोर, पेन निलाहता पद्दतकुंक विरोद कीताप आंता. अल्हा ताकवोर ओनद-ओरे सिक्सा दोर्किचकुंतोर.

3 बेसता कबाहक कियानोंक अदिकारिना वें मन्नो, तप्पु कबळ कियानोंक अदिकारिना वें मनंता. अदुनहाटीं अदिकारिक वेरियाकोंटा मंदना इत्ते, मिमेट सत्तेमते ताकट. अस्के ओर मीकुन मेच्चुकुंतोर.

4 मीवा बेसताहाटींगे अदिकारिल्क पेनदा सेवाकुल्कुनलेसीं कबळ कीसेक मंतुर. ओक्कला मिमेटगिंटा बतलन्ना तप्पु कीते ओर मीकु सिक्सा हीतुरे, इंचि मिमेट ओर्क वेरियसि मना पीता. तप्पु कबळ कियानोर्कुक् सिक्सा हियनाहाटींगे पेन ओर्कुन निलाहता.

5 अदुनहाटीं मिमेट सिक्साताल सिराप तपिच्चकुनालय आयो गानि, मना आत्मातुन कूस ईरलय ओर वेहाताप ताका पीता.

6 देसेमतुन ताकसना अदिकारिल्क पेनदा सेवकुल्के आंदुर. अदुनहाटीं मिमेट ओर्क कर दोहसेक मंतरि.

7 सरकास्क बतलयते हियना मंतांगो अव हीसीम्टु, कर दोहनद दोहदु, तासिल दोहनद दोहदु, अदिकारिल्कुंक वेरियसि मनना इत्ते ओर्क वेरियट, बोर्क कदर हियना मंता ओर्क कदर हीम्टु.

8 मिमेट इंकावरोन पावरम कीम्टु, पावरम कियमळ तप्पा बोर्के आयि बदे पोल्लेता बाकि मनमट. अल्हा मल्लोर मूसाना नियमतुन पालन कीताप आंतोर.

9 अदुनहाटीं, “बोगमतनम कियमट, बोर्कुन हक्कमट, दोंगातनम कियमट, इंका वरोनदुनपोर्रो आस्ति कियमट,”☆ इंचि आदेसकुने रासि मंता. इंका बवन्ना वें नियमकु मत्ते, अव अन्निगुडा उंदे पोल्लेते कलियंतां, अद बद पोल्ले इत्ते, “नीवद निमे बच्चोन पावरम कीकुंतिनो अचोने वेंतोर्कुनगुडा पावरम कीम.”☆

10 वेंतोरपोर्रो पावरम ह्पिचनोर, ओरा नुकसान किय्योर. अदुनहाटीं पावरमता पोल्लेने, दर्मसास्त्रमता पोल्लें निजम आंतां.

11 मिमेट इवन्नि तप्पाकोंटा कियना. मनाहाटीं दुनियाताल मुक्ति हियना पेनदा वेला वेल्लेन दग्गेरा एव्ता. मनम सामिन विस्वासम कीता आ वेलाकन्ना, इंदके मना मुक्ति दग्गेरा मंता. अदुनहाटीं मिमेट निद्रताल तेदाना वेला वाता. तेदसि वेलातुन एरपाट कीसि ताकट.

12 इंदके हीकट मारालय आसि, पोळ्द पेय्सालय आता. अदुनहाटीं हीकटते कियानसोंटव कराब कबाहकुन होळसिसि वेलगुने कियानसोंटा बेसता कबाहकुन मना जीवाते एतकुनकोम.

13 पोद्दला ओप्पनालायक मनम ताकाना. अदुनहाटीं लावारिस तिरिया मनि, कराब पार्टिं कियामन्नि, रिम्मा वायानव उनामन्नि, बोगम कबाहक कियामन्नि, जगडाल्क कियामन्नि, इंकावरोन पोर्रो कळ्ळ पोत्ता मन्नि, गानि मनम बेसता हर्दे ताकाना.

14 इत्ते, सामि येसु किरिस्तुना पोल्लेन मना जीवाते, मना मनसुनाल एतकुनना. मना मनसुने कराब गुनाल्लुकुं हर्हि हियमटु.

14

इंकावरोना कदर कीम्टु

1 बोरे अय्ते विस्वासमते कमजोर मंतोर, ओन्क बेस कदर हीसि मीलोप्पो कल्पट. गानि ओनतोनि बद् बेसतद्, बद् बेसतद् आयो इंचि वळ्ळसेक मनमट.

2 तिनमळ बारेमते केंजट. विस्वासमते मनानोरवेटाल इच्चुर बारे, “तिननव बवय्ते मंतांगो, अन्नि तिनावच्चु,” इंचि इंतुर, गानि विस्वासमते पूने वातोर इच्चुर बारे, “हव्विं तिनामन्नि, सादा कुसिर तिनमळे बेस,” इंचि इंतुर.

3 हव्विं तिनानोर आयि, तिनवोर आयि, ओर इव्वुर्कुन पेन दाना मनकालोर इंचि पेर्कुत्ता. अदुनहाटीं हव्विं तिनानोर तिनवोन पास्कमनि, हव्विं तिनवोर तिनानोनपोर्रो तप्पु दोस्सामन्नि.

4 इंकावरोना जीतागान हळसि, “निमे बेस कबळ कीसतिना हिल्लेना” इंचि वेहानद् मीकु अव्वसरम हिल्ले. अद् कबटा लेक्का ओना मालके हळ्ळांतोर. पेन दाना मनकालोर्कुन गट्टिगा निल्हा परांता, अदुनहाटीं असोटा विस्वासुल्क गट्टिगेन निल्लंतुर.

5 बोरो-बोरो बदाना उंदि रोजुन अन्नि रोजकुंकन्ना बेसता रोजु इंतुर. इंका बोरो बारे अन्नि रोजुक उंदेतीर समानमे इंचि इंतुर. बोरे आयिर मी मनसुने बद् बेसतद् इंचि अनपिस्ते अल्हेन कीम्टु.

6 बोरेन्ना बदाना उंदि रोजुन अन्नि रोजकुंकन्ना बेसता रोज इंचि नोमते, सामिनाहाटीगे नोमंतोर. अन्नि तिनानोरगुडा सामिनाहाटीं तितोर आनि पेन्दुक दन्यवाद कीतोर. बोरे अय्ते तिन्नोर ओरगुडा सामिनाहाटीं तिनाकोटा मंचि पेन्दुक दन्यवाद कीसेके मनांतोर.

7-8 मनालोप्पो बोरे आयिर, संतम ओनाहाटीगे इंचि पिसोर, सामिनाहाटीं पिस्संतोर. हायिनागानि सामिनाहाटीगे हांतोर. इल्हा मनम हायिना, पिस्सिना सामिना लोकुल्कुमे आंदुम.

9 जीवाते मत्तोर आयि, हासोत्तोर आयि, अंटोर्कुंक सामि आसि मनना इंचि किरिस्तु हासि मर्रा जीवाते तेदतोर.

10 अदुनहाटीं विस्वासमते गट्टिगा हिलुवा विस्वासिर आयिर, विस्वासमते गट्टिगा मत्ता विस्वासिर आयिर, निमे ओरापोर्रीं तप्पु बारि दोस्संतिन? ओर्कुन बारि पास्कंतिन? बारित्ते मनद अंटोरद उंदि रोज पेनदा राजगद्देता मुन्ने न्यायम आयना मंता.

11 दीना बारेमते पेनदा पुस्तकमते इल्हा रासि मंता:

“नना ओट्टु तिंचि वेहासेक मंतन, अंटोर लोकुल्क नावा मुन्ने टोंगरां ऊनसि, ननाने पेन इंचि एरपाट कियानुर.”✧

इंचि मंता.

12 अदुनहाटीं मनम अंटोरम पेनदा मुन्ने नित्तिसि मना लेक्का हियापीता.

इंकावरोन पापमते अरहमट

13 इंदकेताल मनम बरोना पोर्री वरोर तप्पु दोस्सामन्नि. इच्चोरे आयाका, दंटाता विस्वासिन विस्वासमताल तप्पिचचना कबाहक, पापमते अरहना कबाहक मिमेट कियमट, दीन मति ईट.

14 नना येसु सामिनतोनि कलियसि मंतन इंचि अन्नि तिडिं नाकु ओज्जंतां, इदु नना एरपाट कीकुत्तन. गानि बोर्क अय्ते बदाना तिडि ओज्जाकोटे, ओर अदुन तिनाकोट्टा मत्तेने बेस मनंता.

15 निमे तिनानवुन हळसि, पूना विस्वासुल्कुना मनसु नाराज आसि पेनदुन होळसीते, नीवा लोप्पो पेनदा पावरम हिल्ले इत्तापे. असल ओराहाटीगुडा किरिस्तु हातोर, गानि निमे नी गाटोताहेंदाल ओर्कुन नासडेम कियमा.

16 इत्ते, “नना बेस कीसंतन, बिल्कुल तप्पा हिल्लेन इनकुंतिन,” गानि इंकावरोना नदरते निमे तप्पंतिन. दीनहेंदाल नीवदे बदनाम आंता. इंचि तिनुळ-उनुळते जेगर्ता मन्नु.

17 पेनदा राज्येम, इत्ते मना पिस्वर पोर्री किरिस्ते राज्येम कियना. दाना राज्येम इत्ते तिनमळ-उनमळता पोल्लेगें अचोने इंचि इनकुनमट गानि पेनदा मुन्ने सत्तेमते पिसमळ, पवित्र आत्माहेंदाल दोर्कना सांति, आनंदमते मनमळ आंद.

18 इल्हा किरिस्तुना सेवा कीतोन पेन मेच्चुकुंता, लोकुल्कुना नड्डुमगुडा ओनकु कदर दोर्कता.

19 अदुनहाटीं मनम बस्केळक सांति दोर्कानव आनि विस्वासमते बेर्सना कबाहक कीकोम.

20 तिडिहाटीं पेनदा कबळतुन नासडेम कियमट. अन्नि तिडिं बेसतवे गानि बदाना तिडिं बोनकन्ना इस्टम हिलाकोटे, दान मनम तिचि ओन विस्वासमताल हिळु अरहमळ मनद तप्पे आंदु.

21 हव्विं तिनमळ आयि, अंगुर कल्लु उनमळ आयि, इंका बतलन्ना आयि पूना विस्वासल्लुकुं इस्टम हिलाकोटे, निमे इव अन्निनाल लक्कु मत्तेने बेस मनंता.

22 इवुना बारेमते मीवा विस्वासम बल्हा मंतानो, अद मीकु आनि पेनदुके एरपाट मनगोम. बोर मनकल अय्ते ओना विस्वासमतुन पीसि “तप्तन-हेळतन” इंचेके अनमानम कियाकोटा मनांतोर, ओर वेल्लेन आसिर्वाद दोर्कतोर आंदुर.

23 गानि अनमानम कीसेक तिनानोर, पेनदा मुन्ने तप्पु कीतोना लेक्कातेने वांतोर. बारित्ते ओर पेन पोर्री विस्वासम कियाका तिचेके मंतोर. पेन पोर्री विस्वासम कियवा कबाहक, ओन पापमते अरहंता.

15

विस्वासमते कमजोर मत्तोर्कुं सहायम कियना

1 अदुनहाटीं, विस्वासमते गट्टिगा मत्तोरम मनम सिराप मनाकु सुकम हियना कबाहके कियाकोटा विस्वासमते कमजोर मत्तोर्कुना कबाहकुन हळसि ओप्के पीसि मंदगोम.

2 मना दंटातोर्कुना बेसताहाटीं ओरा विस्वासम बेर्सना इंचि ओर्कुन कूस ईर्ना लायक मनम मनमळ गावाले.

3 किरिस्तु इद बूमिपोर्री वातस्के ओनद ओरे कूस कीकुनालय वायाहिल्लोर. गानि, “पेनबाबा, नीकुन अपमानम कीतोरा अपमानम नाक आया पीता.”✧ इंचि किरिस्तुना बारेमते दर्मसास्त्रमते रासि मत्ताप जर्गता.

4 दर्मसास्त्रमते मुन्नेटाले रासि मत्तद उंदि-उंदि पोल्ले मनाकु कराहनाहाटींगे मंता. अदुन करियते मनम ओप्के पीसि दैरनेमते पिस्सा परांतोम इत्ता आसे दोर्कता.

5 अदुनहाटीं मिमेट येसु किरिस्तुना विचारम मत्ताप, अंतोर कूळसि मंदालय पेन मीकु दैरनेम, ओप्के हियिकांटीं.

6 इल्हा मिमेट अंतोर उंदे मनसु, उंदे लेंग आसि मना सामि येसु किरिस्तुना पेनबाबन तल्सकुना परांतरि.

7 किरिस्तु मीकुन बल्हा ओप्कुत्तोरु, अल्हेने मिमेटगुडा विस्वासमते कमजोर मत्तोरुन पेनदुक महिमा दोर्कना इंचि ओप्कुटु.

8 नना वेहानद बतल इत्ते, एनकटा यहुदि पेद्दाल्कुंक पेन पोल्ले हीसि मत्ता, अद पोल्ले निजम आयाना इंचि, कतना आतोरा लोप्पो किरिस्तु सेवक आसि वातोर. इद पोल्लेतुन मर्गमटु.

9 अचोने आयाका यहुदि आयवोरगुडा पेन ओरापोर्रो कीता दयाताहाटी दान तल्सकुनना इंचि किरिस्तु वातोर. बजन संहिताते इल्हा मंता:

“नना यहुदि आयवोरतोनि कलियसि, नीकुन तल्सकुंतन.”✠

10 इंका इल्हागुडा रासि मंता.

“ए यहुदि आयवोरिता, पेनदा लोकुल्कुनतोनि मिमेटगुडा कूस आम्पु.”

11 मर्रा इल्हागुडा रासि मंता:

“ए यहुदि आयवा लोकुरिता, मिमेट सामिन तल्सकुंटु, पूरा देसेमतोर ओन तल्सकुंटु.”✠

12 मर्रा यसायाहल रासतोर:

“यिस्साना वंसंमताल वरोर पुट्टानुर, ओर अन्नि जातिनोरपोर्रो राज्येम कियानुर, इंका अंतोर ओनपोर्रो आसे ईरनुर.”✠

13 मिमेट विस्वासम कीताहाटी, मीकु आसे हियना पेन अन्नि तीरकुना कुसि, सांति हियिकांटी. इल्हा पवित्र आत्माता ताकतहेंदाल मीवा आसे बेरस्सेक होंदार.

14 विस्वासुल्कुनिटा! मीलोप्पो वेल्ले बेसतनम आनि तेल्वि मंता. अदुनहाटी मिमेट वरोंक-वरोर बुद्धि वेहकुना परांतिर इंचि नाक पुरागा बरोसा मंता.

15-16 पेनदा कुर्पाहेंदाल यहुदि आयवोरा नड्डुम येसु किरिस्तुना सेवक आसि पेर्मनालेसी बेसता कबुर वेहालय नाकु अदिकारम दोर्कता. अदुनहाटी कोन्नि पोल्लें मीकु मति कीसि हियना इंचि मीकु दैरनेमते रासतन. ना मनसुने बतल मंता इत्ते, यहुदि आयवोर पवित्र आत्माहेंदाल पवित्र आयाना आनि पेन ओर्कुन ओप्कुननालायक कियना.

17 येसु किरिस्तुना लोप्पो कलियसि मंचि, इल्हा पेनदा सेवा कीसेके इंचि नना वेल्लेन कुसिते मंतन.

18-19 यहुदि आयवोर नना वेहता पोल्लेन केंजतुर, नना कीतव चिन्हां आनि इचंन्रमता कबाह्कुन हळतुर. केंजसि, हळसि ओर किरिस्तुनपोर्रो विस्वासम इरतुर.

इल्हा नना पवित्र आत्माता बलमते येस्सलेम सहरताल इलुरिकुम एरिया एवनदाका किरिस्तुना बेसता कबुरतुन वेहतन. अदुनहाटीं किरिस्तुनाहेंदाल कीता पोल्लेंगें नना दैरनेमते वेहंतन. इलुंक तप्पा वेंर बवे पोल्लें वेहोन.

20 किरिस्तुना पोरोल बगा अयते केंजा हिल्लुर अगा होंचि नना बेसता कबुर वेहना इंचि नावा मनसु तनलाळसेक मंता. गानि इंकावरोर दोहता पुनादिपोरों लोन दोहमळ इस्टम हिल्लाहेंका, इंकावरोर वेहता नाहकुने होंचि वेहमळ नाकु इस्टम हिल्ले.

21 गानि दर्मसास्त्रमते इल्हा रासि मंता:
“ओना बारेमते बेसता कबुर एरपाट हिल्वोर ओन ह्ळानुर.
ओना बारेमते केंजवोर, ओर्क तेळियार.”✠

पौलुस रोम सहरते होत्तोर

22 इल्हा बेसता कबुर एववगा नना होनगोम इत्ता विचारमतेन मनुंदुन, अदुनहाटीं नना मिहगा वाया पराहिल्लेन.

23 गानि इंदके, हींदा एरियाने येसु किरिस्तुना बेसता कबुर वेहना कबळतुन महतन, इगे बतल कबळ हिल्ले. अल्हेने वेल्लेने वर्सानाल मिहगा वांतन इंचि नावा जीवा तनलाळसेक मंता.

24 अदुनहाटीं नना स्पेन देसेम होननेंके मिहगा वांतन इंचि आसे पळसंतन. मीवातोनि कोन्नि रोजकु मंचि नावा मनसु निंडता पजा नाकुन अगटाल मुन्नेटा पय्नेमताहाटीं साल्ता कीम्टु.

25 गानि इंदके नना पेनदा लोकुल्लुकुं सेवा कियालय येस्सलेम दांतन.

26 बारित्ते मेसिडोनिया, अकाया एरियातोर विस्वासुल्क संदा वाटसि, येस्सलेम सहरते मत्ता पेनदा लोकुल्लुकुनाल बोर अयते गरिब मंतुरो ओर्क सहायम कियना इंचि विचारम कीसि नाक हीतुर.

27 ओर इल्हा कीसि कूस मत्तुर, इल्हा कियमळे गावाले. बारित्ते यहुदि आयवोर्क पेनदा लोप्पो कलियालय आसिर्वाद दोर्कता, ओर यहुदि लोकुल्लुकुं अक्सरम मत्तवुना सेवा कियमळ गावाले.

28 अदुनहाटीं जमा कीता कोत्तन नना बेस ओसि ओर्क अप्पजेपंतन, पजा अगटाल होननेंके मीकु कलियसि स्पेन देसेम दांतन.

29 नना मिहगा वातस्के मनम अंटोरम किरिस्तुना आसिर्वादते निंडांतोम इंचि नाकु एरपाटे.

30-31 विस्वासुल्कुनिटा! मना येसु किरिस्तु सामिनाहेंदाल आनि पवित्र आत्माता पावरमहेंदाल मीकु बतल विनंति कीसेक इत्ते, यहुदिया एरियाते मनना अविस्वासि लोकुल्कुना कय्दाल नना पिस्सना आनि येस्सलेमते नना कियना सेवातुन पेनदा लोकुल्क ओप्कुनना, इंचि मिमेट नावाहाटीं उंदि मनसुने पेनदुक पारतना कीम्टु.

32 मनम पारतना कीताप पेनदुक इस्टम मत्ते, नना मिहगा वासि कोन्नि रोजकु मीवातोनि कुसिते मनंतन.

33 साति हिय्यना पेन मीवा अंटोरतोनि मन्निकांटी. आमीन.

16

विस्वासुल्कुंक पौलुस जोहार वेहतोर

1 मना विस्वासि अक्कल पीबि इनानद बच्चोरो बेसतद आंद. अद किकिरया नाटेना कलिसियाते सेवा कीसेक मंता.

2 अद वेल्लेटोर्क सहायम कीता, अल्हेने नाकगुडा सहायम कीता. अद मिहगा वायानय्ते, पेनदा लोकुल्क ओप्पनालायक मिमेट दान बेस हळकुंदु. अल्हेने दान्क बतलन्ना अव्सरम मत्ते सहायम कीम्टु.

3 पिरिसकिला आनि दाना मुय्दो अकविलांक नावाहेंदाल जोहार वेहाटु. ओर नावातोनि येसु किरिस्तुना सेवा कियानोर आंदुर.

4 ओर नाकुन पिसागोटनाहाटीं ओरा जीवातुन हियालयगुडा तयार मत्तुर. नना ओर्क दन्यवाद कीतन. सिराप ननाने आयो गानि यहुदि आयबोरा अन्नि कलिसियानोरगुडा दन्यवाद कीतुर.

5 ओरा लोतगा जमा आयाना कलिसियातोर्कगुडा नावाहेंदाल जोहार वेहाटु. आसिया एरियाते अंटोर्कन्ना मुन्ने किरिस्तुन विस्वासम कीतोर ना दंटागाल इपेनितुस इननोर्क, नावा जोहार वेहाटु.

6 मीवाहाटीं वेल्ले कस्टपळतद मरियमुंक नावा जोहार वेहाटु.

7 अंदरिनिक्स आनि युनियास ओर नावा जीवातोर आंदुर, ओर नातोनि जेलने मत्तुर, ओर प्रेरितुल्कुना लोप्पो पोरोल पेय्सतोर इंचि अंटोर ओर्कुन एपाट कीतुर, ओर नाकन्ना मुन्नेने किरिस्तुन विस्वासम कीतुर, ओर्क नावा जोहार वेहाटु.

8 सामिन लोप्पो ना पावरमगल्ला अंपलितुसुंक जोहार.

9 मावातोनि कलियसि किरिस्तुना सेवा कियानोर उरबानुसुंक नावा जोहार, अल्हेने नावा पावरमगल्ला इस्तुकुसुंकगुडा नावा जोहार वेहाटु.

10 किरिस्तुनलोपो तकलिप वायिनागानि होळसाकोंटा इमानदारते मत्ता अपिलेस इनानोंक नावा जोहार. अरिस्तुबुलुसना लोतोर्कुंकगुडा जोहार वेहाट.

11 नावा जीवातोर हेरोदियोंकु जोहार वेहाट. नरकियुसुना लोतोर बोर अय्ते सामिन विस्वासम कीतुर ओर्क जोहार वेहाट.

12 तिरुपेना आनि तिरुपोसा इनना अक्काहक सामिनाहाटीं कस्टपळंतां, अवुंक जोहार वेहाट. नावा पावरमगल्ला परसिस इनना अक्कलगुडा सामिनाहाटीं वेल्ले कस्टपळता, दान्क जोहार वेहाट.

13 बोनय्ते पेन पेरकुत्ता, आ स्पुस इनानोंक आनि ओना यावल इत्ते नावा यावानसोंटद, ओर्क नावाहेंदाल जोहार वेहाट.

14 असुकिरितुसुंक, पिलगोनिक, हिरमेसुंक, पत्रुबासुंक आनि हिर्मोसुंक जोहार वेहाट, ओरतोनि मनना विस्वासुल्लुकुंकगुडा जोहार.

15 पिलोलोगुसुंक, युलियंक, नेरयुसुंक आनि ओना हेलडूक जोहार वेहाट, उलुम्पासुंक आनि ओरतोनि मनना पेनदा लोकुल्लुकुंक जोहार.

16 मिमेट वरोंक वरोर कलियतस्के पवित्र पावरमते जोहार कीम्टु. किरिस्तुना अन्नि कलिसियानाहेंदाल मीकु जोहार.

17 विस्वासुल्लुकिना! इच्चुर लोकुल्लुक मिमेट करियता पोल्लेन हेळाहलय ई पोल्लेंक विरोदमते वेरे पोल्लें वेहचि मीलोपो वरोनद-वरोंक अर्काकोंटा कीतुर. असंटोरतोनि उसारते मंचि, ओर्क लक्कु मंटु इंचि नना मीकु विनंति कीसेक मंतन.

18 असंटोर मना सामि किरिस्तुना सेवा किय्युर, गानि ओरा पीटाहाटीं सेवा कीतुर. ओरा तिय्यटा पोल्लेनाहेंदाल सीदा-सादा लोकुल्लुकुन मुळहंतुर.

19 बेसता कबुरता पोल्लें मत्ताप मिमेट ताकसेक इंचि अंटोर केंजतुर, अदुनहाटीं नना वेल्ले कुसिते मंतन. मिमेट बेसता पोल्लेनहाटीं बुद्दितोर आसि मंटु, सेड्डा पोल्लेनहाटीं लक्कु मंटु इंचि नना मीकु वेहासेक मंतन.

20 मनाकु सांति हियना पेन बिराने देय्यमतुन मीवा काल्कुनगा तच्चि जारसि पोहंता. मना सामि येसु किरिस्तुनद मीवापोर्गे कुर्पा मन्निकांटी, आमैन.

21 नावातोनि कलियसि किरिस्तुना सेवा कियानोर तिमतोनाहेंदाल मीकु जोहार. नावा जीवातोर लुकियुस, यासोन आनि सोसिपत्रु ईराहेंदाल मीकु जोहार.

22 पौलुस वेहताप इद सिट्टिटुन नना तेरतियुस इननोन रासतन, सामिना लोपो मीकु अंटोर्क जोहार.

23-24 नाकुन, कलिसियातोर्कुन हेडमितोरलेसीं बेस ह्ळना गयुसनाहेंदाल मीकु

जोहार. इद नाटेना कोत्तना व्यवहार कियानोर, इरास्तुसना हैंदाल मीकु जोहार. अल्हेने कवारतुस दादानाहेंदाल मीकु जोहार.

25-27 येसु किरिस्तुना बारेमते नना वेहता बेसता कबुर परकारम, पेन मीकुन विस्वासमते इंका गट्टिगा किया परांता. इद बेसता कबुर एनकटा कालमताल मर्ममते मत्ता. गानि इंदके पेनदा कबुरतोर रासता पुस्तकाल्कुना हैंदाल मर्ममते मत्ता बेसता कबुरतुन बय्यारा कियालय माकु वेहता. अंतोर लोकल्क इद कबुरतुन विस्वासम कीसि, पेनदा पोल्लेने ताकाना इंचि पेन आदेस हीता. आ बस्केळ्क मनना उंदे तेल्विगल्ला पेनदुन, मनम येसु किरिस्तुनाहेंदाल बस्केळ्क महिमा कीकोम. आमीन.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068